

# *CHELDECHEDUCH* ER A BELAU



**A Collection of Palauan Legends edited and revised by Masaharu Tmodrang**

**Illustrated by Silvino Maech**

**Copyright 1997**

PROPERTY OF  
PALAU COMMUNITY COLLEGE  
LIBRARY

DRAFT

# **CHELDECHEDUCH ER A BELAU**

**Edited & Revised**

**BY**

**Masaharu A. Tmodrang**

**Illustrated by  
Silvino Maech**

**Copy right 1997  
Printed: Education Media Center**

DRAFT

## OMESODEL TIA EL BABIER

A chelsel a taem el kurreor el osiich a suobel el mo er a rengalek er a skuul, e ak mlo metik er ngii el dimlak a cheldecheduch er Belau el llechukl er a chimo el babier. Ng mle betok a cheldecheduch e ng di mle llechukl er a betok el kakerous el babier.

Aika el cheldecheduch a mlengai er a kakerous el babier me a hong. A oumesingd er ngii a mlengai e a hong el Cheldecheduch er a Belau: Vol. I me a Vol. II. el mlekedmokl er a *Palau Community Action Agency (PCAA)*. Aika el teblo el babier a kngilai a cheldecheduch er a chelsel el odak e meruul el di mo chimo el hong. A bebil er a cheldecheduch a mlengai er a hong el Rechuodel el mlekedmokl er a *Palau Society of Historian*.

Ak kmal mereng a sulir tirke el chad me a obis el kildmokl aika el cheldecheduch el locha er a babier me ng mo sebechir a rengelekel a Belau el ousbech.

Ak dirrek el kmal mereng a sulel a Kempis Mad el kmal chiloit a betok el temel el omes er tia el hong. Ng kmal mle betok a ungil el uldasu el lilecha er a omengedmeklel tia el babier. Ng dirrek el ullengeseu el mesmechokl aike el mle telemall el omelecheselel a tokoi.

A klou el omereng el saul a dirrek el mo er a Silvino Maech el ngii a mle *illustrate* er tia el hong. A dechal er a zunga a mlo uchul e tia el hong a desemeriar el omes er ngii.

Kom kmal mesaul.

Masaharu Tmodrang

## Beldeklel a cheldecheduch el ngar er tia el hong

<u>Ngklel a chaldecheduch</u>	<u>Page</u>
1. Belas el Teruich a Dial	1
2. Sechou me a Deroech	5
3. Teb me a Luk	7
4. Redil el mlo Mesekiu	10
5. Tebang me a Demal	12
6. Tutau me a Remerang	14
7. Ngeleketbudel me a Metechelsel	17
8. Ngirailemesang	21
9. Meluadeangel	24
10. Osilek me a Oreng	29
11. Bekai er a Okerduul	32
12. Tucheliaur	39
13. Ereallbtil me a Rrusbedengel	44
14. Tulei me a Surech	47
15. Rechuluchel	49
16. Melamitoi	52
17. Sechou me a Tukidolech	55
18. Tebruchel	57
19. Meduu er a Ngibtal	59
20. Biib me a Matkerumes	62
21. Mlechei	65
22. Ngiratumerang	67
23. Medachelbai me a Uchulachetiu	70
24. Ngirngemelas me a Obirrir	73
25. Kedungelchebud me a Dengerengelchebud.	76
26. Katuu me a Mengerenger	78
27. Meruk me a Bechars	80



## A BELAS EL TERUICH A DIAL

A Ngerengas a blai er a kebliil er a Esuroi el bita el blai se el lemetiud a beluu er a Irrai er a irechar. A Ngerengas a lekiliei er ngii a obekul a Belas me a bechil er a Elong. A Belas a kilie er tia el blai obengkel obekul. Tirka el teru el odam a ulechell er a Ngermechau el beluu er a Ngigual. Te kilie er a Ngigual el mo meklou el chad, e ng mad a demerir me te doklii, e remiid el mo remei er a kotir, e le te kmal chad er a Irrai.

Me te kilie er a Ngerengas, e ngika el obekul a Belas a mlo Ngirngerengas. Ngika el Ngirngerengas a mle chad er a omelenges. A Ngigual a kmal merael a chisel er a klisiich me a bleken er a mekemad, e le ng mle obdois a rechedal. Me a mekemedil a Oreor a me nguu a Irrai el beluu er a Oreor me te me dmak e dmanges el mo oumekemad er a Ngigual. E a rechad er a Irrai a medengelii Ngirngerengas me a ochellel er a Belas el kmo, te ulechell er a Ngigual me ng diak lolai er tir el mo er a

mekemad e le te ko er a melengmes er tir. E a Ngirngerengas a kiei, e romenges el kmo, te merael er a klukuk el mo er a Ngigual. Ng ulemkokl el mo songes a ilotel el mei me ng mart, e ngii a ngmai a lidel, e remurt er a ked el mo er a Ngigual, e ngmai a irratel<sup>1</sup> el lochetii, e oldechelakl. Me ng di mle ua ise el bek el lebo er ngii a mekemad, e ng ua ise me ng ko er a kmal di bloseh er a rengrir a rechad er a Irrai. Me a lleta el mong el mo manged, e te mocha kerekikl el mo omdidm er a ko er a bluchellel a Ngirngerengas el chad, e dongchia el Ngirngerengas. Me a lluat a mekemad el mo er a Ngigual e ng tilobed a klekerengel a Ngirngerengas me te kmal mlo ungil el medengelii el kmo ng kmal ngii. Me te mocha katekoi, e a llabsis el Ngiraked a oderchii a oderchelel el mo er a lbedul el kmo, "Aki mla mo medengelii el Ngirngerengas." Me a lbedul a ngiluu a chelebuche el msa oderchelel el me er a Ngiraked el kmo, "Mokodir a Ngirngerengas." E a lebung e ng beluu er a Irrai el

<sup>1</sup> meaning

melasech er a sob<sup>2</sup> me a Ngirngerengas a obengterir.

Me a lemerekong el di lechedool kung, e a Ngiraked a ulderchii oderchelel mo er a Ibedul el kmo, "Ngiaos er a tutau, e korrenges a chais." E tir a bad er a bai, e merasm, e a bo el kukuk, e ng omengado. Me te choduii a sob el rokir el mo merek e di mle bad er a bai. A bo el tutau, e tir a ilbelbii<sup>3</sup> a bai e tmuu el mekdir a Ngirngerengas. E a ochellel er a Belas a chemiis el tuobed, me te nguu a budel a ukall el teleber<sup>4</sup> el mechelii a bita el beluu er ngii me ng delebechel, e chemiis el tuobed el me er a Klai el blai er a Ngerusar e kmo, "Ngak oteiill me mosebelak." Me te nguu el mertii er a reakt. E ngii a merema a urrurt<sup>5</sup> el oker el kmo, "Ng dimlak le me a Belas?" Me te kmo "Ng dimlak le mei." Te kiei el mo klebesei, e te mocha otekir el mo okerdii er a Ngermid me ng milrael el mo er a Choang el blai el mo er a kebliil er a Ngerengas er a Irrai. Me

ng kiei er ngii e mocha melekoi er a Ibedul el kmo, "Ng soak a dolai er a Irrai." Me a Ibedul a dilu er ngii el kmo, "a Irrai a diak lengiuul er a Oreor. Me kau di bo morrenges a tekingek, e a Irrai el beluu a mo sebechel el mo melanges er kau. Berekii osengem el mo ungil el menguii a chelebulir a remechesil a Ikelaui, e bo bekokuui el mo er tir er a chelebulir, e tir a mo tutkau er a mo er a ungil derechuall el bo mokodongall er ngii." Me ng kilengei, e mlo melemolem el meruul a lullekoi er ngii a Ibedul. Me a lebekiis er a tutau, e ng ngiluu a chelasel, e mo tuobed er a Idederach, e olengimes el me tmuu er a Sechemus el mo remei. Me ng mo omibii, e olengukes er a bek el blirir a remechesil a Ikelaui el diak a chimo el lechitii. Me aike el rokui el omengedil Oreor a di lebo er ngii. E mo er a Ngeseksau me ng chodesii a beng er ngii, e oldingel er ngii. E tia el beng a kmal melai a ngikel, me se lebe lturk e ng ua kerreomel<sup>6</sup>, e ng mo chusuch, e oudersechimo el

<sup>2</sup> meaning

<sup>3</sup> meaning

<sup>4</sup> meaning

<sup>5</sup>

<sup>6</sup>

chelsuch el merous er aike el bla lora el blai el rokui. Me ng kmal klunga urungulel er a rechad el rokui. Me ngii me ng di ngii lorrenge a chetengakl el mo er ngii.

Ng kiei e ngii a medei a Ngiraikela me te mengemeldiil, e mocha doklii. E a tekingir a Rengarameketii a mocha oker er a mo Ngiraikela. Me a remechesil a Ikela el mla er a blai a di dilu el kmo, "Ng mo rubak a Belas el Ngirachoang." Me tia er a letetkii er a kebekuul, e ng kmal mlo ungil e dmeu a rengul, e kmal mlo ungil el mtab a osisecheklel a Ibedul el mo er ngii. Me a lemede a Ngirmengiau el lebo loker el mo er a blai, e te dirrek el kmo, "A Belas el Ngirachoang." Me ng kmal mlo ungil mela telmukl<sup>7</sup> (osisechakl, llechul) er a Ibedul me ng mlo diak er a rengul a ngma udoud el mereked er a chimal. Aike el techiau er a klobak el mo er ngii di bo loues, e msa ngike el kldorolel se el klebesei.

Me a ta er a klebesei, e ng tuobed el oldengelengel er a

cheraches el mo metik er a Ngiraibuuch er a Ngerbeched el merrars a choalech. Me ng kmal chubra me ng dula el kmo, "Ngiraibuuch, becherei e mei me dedak." Me ng ngiluu me te dilak me ng milkekii a mlil er a ngikel, e nguu a mlil, e meius el nguu el me tungii er a tochel a Ngiraibuuch er a Tuchedesang. E ngma cheldil el kmal mlo betok e mocha merader er ngii er a blil, e me melikes el mo remei me ng remous a cheldil el dirrek el di oltirakl omerellel er a bek el klebesei. E mocha blechoel el lebo er a chei e ng me melecha odimel a Ngiraibuuch. E a Ngiraibuuch a mechitechetong, me ng di kiei er a ulaol e di oltmedum a medal er a Belas. Se el lebo er a chei el me me le ngii el tang, e ng mecholou a ngikel e remuul a odimel el di bo lolengoes, e ngii a merael el mo remei. Me ng di mle ua isei me a lemede Ngiraibuuch e losiik er a mo Ngiraibuuch, e a remechas di dilu el rokui el kmo, "Ng diak a mong, ng di Belas el Ngirachaong a mo rubak." Me seikid e ng mocha rubak. Me aike el

---

<sup>7</sup> llechul

urrerel er a lengar er a Choang el mekudem el meruul me te omes e nguibes a rechad el mo tnuu er a kebliil er a Ikelau, me a dirrek aike el lekaukebliil a Ikelau er a Ngeremlengui me a Ngetbang me a Irrai me a Ngermid me a Ngerechemai me a Ngerekebesang me a Beliliou. Me te cheroid, e ng di te di kaukebliil el mo er a Ikelau. A le kakerker, e ng kmal di mo Belas el Ngirachoang a lolatk el mo bedul ngii. E le ng kmal ngii a ngila telmukl er a Ibedul a uchul me ng ngeltengat. Me ng betok el dui el di blo loluchel, e di mle sebecel lolab e le ng mle subed e le ng sorir a remechesil a Ikelau me a ruurot er a Ikelau el rokui me a rubak me te di kilengei el di ultirakl er a tekoi er a kebliil. Me ngika el chad a di ta el chad e mlo teruich a dial. Me aika el teruich el dui a mlo ulengokllel<sup>8</sup> er a ltechela aika el teruich el dui, el dui el dirir er a Ngerengas. E mlo bechil Ebil el rubak el dil er a Irrai, e kilebsii a bachel me ng oubiungel er ngii, e te kmo ng mekull er a chelid

el Medechiibelau. E ngii a kmal lulecholt er ngii er a Irrai me ng milecherar olbiungel me ng mlo subed el loubiungel a bechil. Me aika lomerellel a di rokui el lulemekrael er ngii a Ibedul a uchul me ng mlo ua ise. Me cheselsel el ulengoklel a ngar er aike el blo ltuchel el dui er ngii el beluu. Me ng di ngii el ta mlo teruich a dial me ng ngii a mlo okodongall er aika el truich el dui el lulluchel. Me ngii a dokodongii el kmo, "Ngiluu techemo el chad<sup>9</sup>," el belkul a kmo, ng merael el mo er bab el chad.

8

<sup>9</sup> ng merael el mo er bab el chad

## SECHOU ME A DEROECH

A Ngerberuuch a beluu el ngar er a delongelel a Ngchemiangel me a Chelechui er a Imeliik. A Sechou a ngar er a ongdereberebellet er a ta el tutau e a lomes er a sechelil er a Deroech e ng dirk tutau e ng melechelbakl el omereberek a osebekel el merrau a ngikel, me ng oker er ngii el kmo, "Rrang tia el kmal dirk tutau e ke merrau me aika medam el ua derse chimo el olechesobel. Ke oungalek?" E a Deroech a kmo, "Rrach ng diak ng klengerenger a uchul." Me ng dula er ngii el kmo, "Rrach ng diak kome me di el ta el kurrael er kid el mo er a debo er ngii me di donga e lak dolechelbakl el ua kau er chelecha el ko er a olechesobel a medam. E a kumdasu e ng diak a ngikel." Me a lolekoi el ua isei e a Deroech a kmal kilenge e kmo, "Ng kmal mera e rrang. Me ng ko el mo ungil besul er a oingera me kede mong? Ng di kau obang." Me a Sechou a kmo "Mada debo er a klukuk. Me ker di me kasues er tia e merael." Me a bo el


kukuk e te mocha kebetech er tia el ledillii, e a Sechou a mocha melekoi er a Deroech el kmo, "A debo e lebo el betok, me kid a di sobechid me kerdi chachelechel me ng diak bo deklsakl." Me a Deroech a dula, "Ng diak e rrang, ngii di demereched el mo me desang. Elecha e tir a sobeka el mo er a chelmoll, me a lebo e te mlo reboreb er a chiloil e ngii a mocha mengerobet<sup>10</sup> a chiloil. Me te reboreb e a Sechou a kmo, "Rrang, msall e kau a kmal mereched a rengum. Kau bo mkilmeklii a rengum e bo el blengkangk a chei e di doruu e ng mo medeel er kid." E ngii a di mle telkib e ng kmo, "Rrang, ngak a ma mochu er a di bita er kau e le ak meduch el merrau." Me a Sechou a dula el kmo, "Ke ma mo merrau, e a bo el meched a chei me di doruu e ke le bo mongoit. A domekbat e ng mekngit er a di doruu." "Ng diak, bai ba kbong." Me a Sechou a kmo, "Mada ng di kau." Me ng metengel el mo merrau. E ngii a obengkengka chei me ng di mlo berriid me ng di

---

<sup>10</sup> meaning

ulitur omengang. E a Sechou a kmo,  
 "Ng diak lungia me bai boderei." E  
 ngii a kmal meringel a rengul er a  
 ika el ngikel el di cheloit me ng di  
 mlenga me ng di ultom a kemril a  
 ngikel er a ngerel e kmo, "Doraël."  
 Me te sobekang, me a lsebek e te  
 ngar er a medal a chiloil e ngii  
 omudech e mocha blechakl er a  
 daob. E a Sechou a mlo reboreb er a  
 chiloil e dula el kmo "Ke ongellau, e  
 kau oba omerolled." Me te kuk  
 sobekang. Me a rebeta e a Sechou a  
 mocha meliuekl er ngii e kmo, "Ak  
 mo er se el de bla er ngii e oiellau."  
 Me ng mo me ng reboreb e mengiil e  
 ngii a merema el di miludech a kklel  
 el mo diak me ng kmal songerengera  
 me ng di mlei el songerenger. Me  
 ng mochu ngmelt a sils e ng lueta el  
 mo tuchelbakl el merrau er a di kekel  
 er se el kesus.

Tia el cheldecheduch  
 ollachidnger er a kmo, "Moserechii a  
 rengum e bo mongirou<sup>11</sup> e ng ngar  
 er ngii a belkul."



<sup>11</sup> meaning

## TEB ME A LUK

A Teb me a Luk a ngelekel a ngelekel a Dam me a Dirraibar er a Ngeruchob. Tirka el teru el odam a mla er ngii a teua el ochederir el mle meklou el redil me te chechiil me te ngar er a obliil. Te di mle mekekere tirka el teru el odam e a demerir a mad.

A ta er a klebesei, e a Dirraibar a dula er tir, "Rengelekei, kemiu tia el meklunga el chad me ng mla mo kiriu el oldingel, e mangedmokl a chelsengrir a ruchedemiu. Me ng ungil a chobo mesa a Olengkoi er a Ngederar me losisecheklemiu er a tekoi er a klochad, e a lak, e ko mo chebuul."

Me a lebocha lekukuk, e ngika el klou el ngelekel er a Teb a ulemkokl el mekiis, e melekoi er a delal, "Ngak, e chedei a mochu er a Ngerderar el mo mela a tekoi er a Olengkoi."

Tia er a lebo er a Ngerderar, e ng dirk tutau me a Olengkoi a reboreb er a cheldeng. A Teb er a lora el mong, e ng di milrael el dobechii a olbed, e merael el mo el lochedii a

kul a ulitech, e tmuu er a blai. A irechar e ng mle mekull a dora el melobech er a olbed er a obliil. Me a Olengkoi a okere er ngii, "Ng ngera chised, e rrang?" Me ng ua sei, "Ngak a mle ele ng soak el me mesuub a tekoi er kau. Ng dirrek el soak a chomosischeklak er a teletelel, e ng mo sebechek el ngma a betok el udoud er a ruchedak."

A Olengkoi a lomes er ngii, e ng ko er a diak el ultebechel a osengel me ng okere er ngii, "Ng mla ngar er ngii a omelium er a udoud er a ruchedam, e diak mngai?" Ng kilengi a Teb. Me a Olengkoi a luueta el oker er ngii, "Se er a chomora el mei, e ng mla er ngii a chelselked el mules." Ng kilenge a Teb. E dilu, "Ng kmal betok." Me a Olengkoi a dula er ngii, "A chomora el, e ke mo er aike el cheselked me ke dobechii a telmedeu er ngii me ng chelebedem. A chobomrei, e lebo er ngii a mechesengul a udoud er kau, e ke nguu el mo er a blil a ta er a ruchedam, e mela a udoud. E a lsekum ng diak lebeskau a udoud, e ke nguu ngii el cheselked el



cholbedii me ng mo medakt er kau me ng meskau."

A Teb er tia er a ldu er ngii aika el tekoi, e ng kmal mlo ungil a rengul, e milrael. Ng mle er a ked me ng dobehii a chelbedel el cheselked, e merael el mo remei.

A lebe lrei, e ng uluchais er a Luk aika el tekoi el lengilai er a Olengkoi. A Luk a di ulerrenges, e ko er a kmal metacherebesul er a rengul. Se el lebo lomtab aika el loleko a obekul, e ng ko er a mo metengchokl el tekoi a lebo longelebed er a ruchedal a lola a udoud.

Me a lebo lekukuk, e ng di mle tutau, e ng mekiis, e diak louchais er a obekul er a omerolel, e merola el mo er a Ngerderar. Me a lebo er a blil a Olengkoi, e ng mlo mo okiu a rsel a orengodel el mo sibeklii a btil a ulitech, e mekokil el mo soiseb er a blai. Me a Olengkoi a di ulemes er ngii, e omdesua el kmo, ngika a kmal kedu el buik. Me ng okere er ngii, "Ng ngera chised, e ochellei me ng dirk tutau, e ke dumiang?" Tia ikid, e ng dula er ngii, "Ngak, e udelei a ngar er ngii a reteua el

ochedak el bechiil me te ngar er a obliil. E ngak a di mle kekerei, e ng mad a demak me ng diak a osisecheklak er a tekingel a klohad, me ng soak, e udelei a chomosisecheklak me bo kmeduch.

Me a Idela el ua isei, e a Olengkoi a okere er ngii, "Ke bechiil?" Me a Luk a kilengei. Me ng liluut el oker, "Ng ngar er ngii a meklechel a bechim?" Me ng kilengei. Me a Olengkoi a luueta el oker er ngii. "Ke meduch el ngar er a chei?" Me a Luk a ua sei, "Ng diak ksal meduch el ngar er a chei. Ak di kmal meduch el mengemang."

Me a Olengkoi a dula er ngii, "Elechang, e a chobo mongemang, e ke dmu er a bechim me ng mo er a mesei. E se el chomei el mengemang, e komrullii a chimo el ongraol, e nguu el mo msa ngike el kot el klou el ochedam. Me a chomluut el mo mengemang, e mei, e ko mo mesa ngike el ongeru el klou el ochedam. E ua ise el mo lmuut er ngike el kot el kekere el ochedam. Seikid, e se el lebo er ngii a mechesengum, e a ruchedam el



rokui a di mo kudmeklii a mechesengum el rokir."


Me a lebe irei a Luk, e ng mocha oltaut aika el osisecheklel a Olengkoi. Ng milrael el oldingel, e omekang er a ruchedal er a bek el klebesei.

A ta er a klebesei, e ngika el kot el klou el ochedal a Luk a mocha katekoi ngii me a remerrengel e kmo, "Kede ko er a kmal mechitecheto er aika el omerellel a Luk. Kele lungil a bo loumur a bechil." Me a lemerema tia el sils el belsechel a merengel a bechil a Luk, e a ruchedal me a rechedal el rokui a mlo kldibel, e ulemoket a udoud el kmal mlo betok me ng mlekedoked a belsel.

A Teb a di ulemes er tia el omeruul, e ngosecha rengul. A Luk a dula er a ruchedal me te kodur a merengel a bechil a Teb.

Tia er a bochal merek e ngika el obekul a mlo medenge a omerellel a ochellel, el mle kekerei, e ua lebocha lorreder er tir. Me se el lebo lomngar, e le beloleiit er a blil a Luk, e ng kmo, "Kuietii a idungel, e ochelle-okdemang."

*Tia el cheldecheduch a milechelii a omeluchel er a Belau el oltiraki er a ruchedad. Tia el blekeradel a ngar er ngii er a Belau el me lmuut er a elecha el sils.*



## REDIL EL MLO MESEKIU

A ta el mechas me a ngelekel el redil el kiliei er a Kerdeu el blai er a Ngerieleb el chimo er a kekere el rengedel a Oreor. Tia el beluu a ngar er eou el beluu, e kmeed er a daob. Me te kie er ngii el teru el ongalek, e kmal mengebuul a delengchekkir e le ng diak a mo omekerreu er a delengchekkir. A beluu er a Belau er a irechar a kmal mle mekull el diak a redil el mesobil, e mo dioll. E ng di kerrior a mlo choisisii a chelebulir, e ngika el ngelekel ngika el mechas a mlo dioll. Me a bocha el dioll, e ng kmal meknge a rengul ngika el delal me ng melekinga er a ngelekel el kmo, "Rungalek, kau tia el dillang, e kid a kmal chebuul a delengchekled er a chelsel tia el beluu me ke kmal mo ungil el mengedmokl-er a kdiull er kau. Ke mo ungil el omekiai aike el delsechel a kldiull me a cheroll me ng diak bo msecher, e kede chebuul el diak a me mekerreuid a bodesecher."

Me a ngelekel a kmal kilenge aika el lullekoi a delal. Me ng ulemekiai aika el delsechel a kldiull me ng dimlak bolsecher, e mechell. Me a lemechellang, e ng melekinga er ngii el kmo, "Rungalek, kau a kmal soam el menga keam, e aika el keam a diak el kelir a rumechell, e le ng ngomkuuk a diil me ke outekangel me se el mesisichang, e ke menga kung."

A ta er a klebesei e a delal a mlo er a meselech el mo melai a kelir, e ngii el ngalek a oba a ngelekel el ngar er a blai, e kmal sokol el menga keam. Me ng ulemdasu el kmo, ng dibus a delak me ak bai kolii ku a chimo er a keam, e ng diak lesekak a delak. Me ng monguu a chimo er a keam el mei me ng metechii el mo erbitang. E mocha nguu tia el klou el bita el me me ng mengard er ngii, e ngii a dumia delal.

Me ng ko er a kilebetiekl, e choitii a ngelekel, e tuobed er a iikr, e merael. Me a delal a oleker er ngii, e ngii a dilmuk, e merael. Me ng mocha kiukuui a ngelekel, e oltoir er ngii el mo bedul a taoch. E ng di ngii er a loracl mong, e ng di iliu el

mo ridekekl er a daob. Me a delal a longelang, e omekedo er ngii, e ngii okor, e di melechelbakl el mo cheroid. Me ng mocha er a tkul a cheldukl, e melekinga er ngii el kmo, "Rungalek, kau tia el dikea morrenge a tekingek, e merolang, e kemam a kmal chebuul." E a lluat ngika el ngelekel el me duum er bab, e ng mla obult el mo mesekiu. Me ngika el delal a melekinga er ngii el kmo, "Kau tia el dikea morrenge a tekingek, e merolang, me ke di mo ocheraol er a kluk. E a cheram a mo orul a mo bechiil el redil." Ngika el mesekiu el ngikel a lemad e ng ngeiuul a olecholl er ngii el mo klilt el ocheraoi er a kluk el mo klitir a remecheleoch el ngalek er a remeteet.

A mesekiu a lemekesokes er a irechar, e lenguu el mei longesechii er a beluu, e lolekoi a kodellel, e ngelmangel el mereberebet a iuchel a medal. A iuechel a medal a diak el kakerous ngii me a iuechel a medal a chad. A omsouel el ngerel a bereked er ngii tia el kelel el lulenga er ngii, e mo suchesokl er a daob. Tiaikid a

cheldechedechal a mesekiu el mle chad, e mo mesekiu el ngikel.



## TEBANG ME A DEMAL

A Rekesiuall a rubak er a Ngial el mlo bechil a Merderad el redil er a blai er a Ongeuikl er a Ngeruikl el rengedel a beluu er a Ngchesar.. A Merderad a mlo dioll, e mechell er a ngelekir el sechal. Te milengeklii el Tebang.

Ng di mle kekerei a Tebang, e a delal a mlo smecher el mad. A Rekesiuall a di millemolem el kiei er a Ngeruikl, e omekeroul er a ngelekel er a Tabang.

A leklunga el chad a Tebang el mocha sebecel el bechiil, e ng mlo bechiil. Tia er a lebo lebechiil, e tia el chebechielel a mlo rullii el mlo diak lebetik a rengul er a demal. Ng mlo meknig it a omerellel ngii me a bechil el mo er a demal. A Rekesiuall a miltord e mlo remei er a belual er a Ngial. A lebong, e te mla nguemed a rechedal me a blil a mla mo mechut. Ng mlo kiei er a bai. A chelitechetul a uchul, e ng mlo diak el sebecel el smiik a kelel, me ng di olengit a kelel er a rechad.

A remekere el chad er a Ngeruikl a mlo kaingeseu el

melasech a mlirir. A ta er a klebesei e a Tebang me a resechelil a mlo er a oreomel el mo omukel er a kerrekar el mo mlil. A uriul er a lenguu a delues me a ilebechel, e te mocha mengurs er ngii el mo er a taoch. Te mlengurs er ngii el me er a ked er a Ngerbusechemlal, e olengull. Tia el ked a ngar er a bebul a meselech el Ilruul a ngklel.

Tia er a lebo el merek el lolengull, e te liluut el mo mengurs er tia el kerrekar. Tia er a lekersii, e ng rirebet el me medesum er a chelsel tia el mesei. Te millasem el oltobed er ngii, e ng di dimlak el sebecir el kursii. Te mlo osiik a bek el cheldechuul, e diak el sebecir el kursii. Te milechire me ng dellemakl er a mesei.

A Tebang a mocha osiik er a chad el meduch el mengelil. Ngika el chad er a ongelil a mlo ochotii el mo er a Tebang el kmo, ng kngtil a omerellem el mlo er a demam a uchul me a kerrekerum a dikea el sebecel el tuobed er a mesei. Tia a diak el sebecel tuobed, a lak bo mnguu a demam el mei. Tia a

dellebeklel e le ng mlo mekngit er a demal.

Tiaikid, e a Tebang a mocha omekall el mo er a Ngiual. A lebung, e a demal a kmal mekngit a chelebulel er a klengerenger. A Tebang a di mlo ngellomel e mocha meluluuch er a demal. Ng uluchais er a demal a teletelel a mlil er a bo loltobed er ngii. Tiaikid e a demal a dula er ngii el kmo, "Tebang, kau a klunga el chad. Ng mla mo sebecchem el di kau. E ngak a mechitechetong me ng diak el soak el mo chosengkau." A Tebang a dilu er a demal el kmo, "Chedam, ngak a mle cheleuid. Ak meluluuch, e olengit me mluut el mei me dedak el kiei. Elecha el mo er a medad, e a rokui el ungil me a klungiaol a mo biongel er a delongeled."

A chelsel a betok el rrak el longebuul a Rekesiuall e ng lueta el mo er a Ngeruikl el mo obengkel a ngelekel kiei. A lebo er a Ngeruikl, e te di mlo el omak er a taoch, e merael el mo er a mesei el ngar er ngii tia el kerrekar. A Rekesiuall a kmal mle mechitechut, e ng di uluutekangel. Ng dilu er a rebek el

chad me te orekedii a ongurs, e ngii a oked er a ngerel a ongurs. Ng mlo dechor, e rullii besul, e mocha mellach er a Tebang. Ng milellach el kmo, "A dolekoi er kau, e Tebang, e kede meked me kolloi, a kerrekar bekiis e ngak a Rekesiuall me ke kmal mo ungil e kerrekar "Tiaikid, e tia el kerrekar a mocha merael el diak loumekaduch a longurs er ngii. A Tebang ulemes er a demal, e longelang, e le ng kmal mlo dmeu a rengul. A Rekesiuall a uleba ngerel a ongurs, me ng rirellii tia el kerrekar el ko er a kmal mo kebekakl. Tirka el mlengurs a kmal di mle mereched el kursii el me er a taoch.

## TUTAU ME A REMERANG

A Ngerebechedrengul a ta er a chuodel beluu er a Ngeremlengui. A rechuodel, e a rechad a ousikero a ochaieu el melai el odoim. A ta el tutau, e a Remerang me a rulebengkel a mlo ousikero. Te mlo ousikero e a ltir e te mlo okiu a beluu er a Ngerebechedrengul.

Te merael el dirk cheroid e a lorrenge er a ngerel a chimo el tutau, e ng oldiu. Ng ngar er a iou, e kmal di oldiu el olsesengerenger ku, e le bersoech a mla melebelii. Ngika el bersoech a mocha oltamet, e olengimes er ngii, me ng mo sebechel el kolii ngika el tutau.

Ng kmal klunga ngerel ngii el Tutau, e le ngika el Bersoech a diak el sebechel el remekeklii me ng kmal di oldiu e le ng medkung. A rebek el chad a orrenge er ngii, e di merael. Ng di Remerang a mocha mechei a klekedellel, e touchekla el mo omes er ngii.

A lebong, e ng mesa a Bersoech el mla melebelii ngii el Tutau. A Remerang a mocha melubet er ngii.

Ng kmal kmes, me ng outekangel el melubet er ngii el ngubetii el rokir. Ng milekodir a Bersoech e ngoura ngika el Tutau el mei me ng mangedecheduch er ngii.

Ng milengedecheduch er ngika el Tutau el kmo, "Ak osebelau me kau a mo osebelak me kerdi kaiuesobel el mo cherechar." Tiaikid a di Idillii el telkib el tekoi, e nguu ngika el Tutau el ko er a sirars a bedengel, e osebekii me ng suebek.

E a Remerang a mocha cholngii a ukedel me aika el bebil er a klekedellel, e merolang el mo remei.

Ng mlo remei a Remerang, e kiei el mo meketeket, e socherang. Ngika mle danges buadel a rektel me ng merael a skel a uchul, e diak lebetik er ngii. A klteketel tia el rakt, e ng dumia a burek er a uchul a delel. Taikid a mle uchul a rektel. Ng milrael el kmal mo meringel, me tirka el chedal a ulsiik a rokui el cheldechulel, e lemukar. Ng di kmal dimlak lebetik er ngii.

Te kiei el kmal meketeketa me ng mocha merael a chais. Ng merael a chais el kmo ng mla mo er ngii a chebill er a Remerang. A rechad a



dirrek el di kldibel ku el omes er ngii.

Tirka el chad el kldibel er a bita er Remerang a lomes er a chimo el Tutau e ng suebek el merema reboreb er a ditmechei. A ditmechei a ta er a bedengel a sis el mle dechor er a ngelong er tia el blai. Ng reboreb ngii el Tutau, e melekoi el kmo, "Remerang, Remerang, ngubetau, ngubetak."

A lechisngekl a rechad el ngar er a blai, e ngii el Tutau a ngmai a ochil el mo omudech a eru el llel me a cheberdil tia el sis. Ng miludech, e odak el mo edei. Ng di uldak el mo edei, e suebek el mo er a iaech.

A bolak el omes er ngii a rechad e ngelmuut el melekoi el kmo, "Tutau, Tutau, Remerang, Remerang, ngubetak, ngubetau." Aikaikid el omelekingel ngika el Tutau a mocha bleketakl. Tirka el chad a mocha ngmai a llel tia el ditmechei. Te ngilai el smilek er a ralm e msa Remerang me ng melim.


Ngii el Tutau a di oututau el di mengelekel a lolekoi. A ongeru er a sils, e ngelmuut el mei ngii el Tutau

me ng melekoi. Ng melekoi, e suebek el mo reboreb er a Ulitech.

A Remerang a dula el kmo, "Becherei, e lak morriik er ngii, e ng mla mo bleketakl a omerollel." Ng reboreb er a ulitech ngii el Tutau, e omes er a Remerang. A lomes er a Remerang e ng mechiuau e mla mo kltukl a medal tia el burek er adelel. Ng suebek el mocha reboreb er a delel. Ng di mlo reboreb e sichesii tia el mla mo meriokl el burek me ng di tilobed a lalech er ngii. Ng di mle telkib, e ng kuk suebek ngii el Tutau el merael. A bo lekukuk, e a Remerang a mocha omechebuchel el merael el mocha ungil. Itia e a Remerang a ouchisa el kmo, "Ngike el Tutau a kulsebelii er a Ngerebechedrengul." Tiaikid e a rechad er a blai mocha medengelii el cheldech duch. Tia el kmal lungia ngii el rubak, e ng mocha melibech er a cheliteklel el mo er a Tutau. Tiakid ngii el cheliteklel el di kedeb.

Tutau er a Ngerebechedrengul a kmu el kmo me ng kuk ngilbetak ngak el kuk ngilbetii. Aki mousikero a ochaieu er a bab er a bechedrengul. Aki bo e a bersoech a

mla melebelii e ak turka me ng kmo,  
Chudelei, mereched el ngubetii tia el  
besebes el melechet er a chiklek.





## NGELEKETBUDEL ME A METECHELSEL

A Imul a beluu el ngar er a Imeliik. A rechad er a kebliil er a Bartekuu a mlo er a ked el mlo omekdudek.

A irechar, e ng dimlak lsa el ngar er a chei a rechad e le te mle medakt a mekekmad. Me te di ngar er a chei er a ked. Te merael er a chelsel oreomel, e a ta er tir a doibechakl er a ta er a rael, e melengetang el mo er a Ngeraod. Ng mesechesoch a medal el omditm a dudek, e ngii a lmangel a ngalek me ng dmul el kmo, "A chedil a ngelekek," e mocha merael el kirel ngika el ngalek el ngar er a uchul a kerrekar.

Me a lekeda er ngika el ngalek, e tirka el chelid a kmo, "Mngam a medal ngilechang, e ng tmak er kid." Me te nguam a medal me ng di mlo meterob, e ko er a rrau a rengul. E te kmu er ngii el kmo, "Bom debesii a ta er a kaiul a buuch, e mnguu el mei me mskur a ngelekem, e mnguu el mo er a beluu." Me ng mocha dobesii a kaiul a buuch e mocha

nguu ngika el ngalek el loa er a chelsel e nguu el mo er a blil.

Me a lenguu el mo er a beluu me ng omekeroul er ngii el mo el mo klou ngii me a ngelekel el lulechellii a bechil. Ngika el ngelekel a chelid me ngika el ngelekir a mle kaukeroul el mo meklou.

Omerolir el mo meklou, e ngika el demerir a blechoel el obeteterir el mo er a chei. A ta er a klebesei e te di kiliei tirka el teru el ngalek. E ngika el rubak a mlo er a chei, e uleknngemedii a ngikel, e a lemei, e ng klebesei me a rengalek a mla mo bad me ng dula er a bechil el kmo, "Bo mdul a eru er a ngikel e molekiis er tirka el ngeleked me lomengur." Me ngika el mechas a mocha ngmilt a teblo er aika el ngikel e dmul me a le merkang, e a bechil a kmo, "Ng dikea molekiis er a rengalek?" Me ng ngika el mechas a kmo, "Msall e kukisii a Metechelsel me lomengur, e becherei a Ngeleketbudel me lemechiuaiu." E diak lodengei, e ngika el Ngeleketbudel a mla mekar me ng orrengees er ngii me ng kma' mlo meknngit a rengul me ng omdesuang

el kmo kamsall e kbad e kusterir el kmo te melekiis er ngak. E a lechub e ngika el mechas a imiu er ngii, e mo olekiis er ngika el ta er ngii el mechiuau, me ng ko er a melechedech er a chelsel a rengul el kmo, ngak ng techa delak. Me ng di ngar er a rengul el diak lolekoi, e di lmuk.

A ta er a klebesei, e ng mlo er a chei ngii me a resechelil, e ng rouar a molech e mertii e nguu el me er a blai me ng loa er a ulebengelel a ulaol el bambuu er tia el leblechoel el bad er ngii. E ngii a mocha ousmecher er ngii. Me a bo el kukuk, e ng diak lebo loilil, e di mechiuau. A omerolel a klebesei el mpng e ng di merael tia el molech el mo bediu. E ngii el buik a di bad el ousmecher er ngii. Me a lsa el kmal mengetelakl ku a bul, e a demal me a delal a sobeka a rengrir el kmo ngika el Ngeleketbudel a kmal el socherang. E ng di diak louchais, e a redelal el chelid a di ulerrenge e kmo bo becherei, e ng ko er a diak el losubed er kid. Me a lsal kmal klunga a bul tia el molech me lemeterakl er a beluu a chisel a

secherel ngika el buik e te mocha tirka el delal el mocha oldingel er ngii er a ta el klebesei. Me ng ngika el delal chelid er a lebong e ng dilu er ngii el kmo, "Ngak tia el mle omes er kau." Ngika el buik a uleker er ngii el kmo, "Kau el me omes er ngak ke keskelek?" Me ng dula er ngii el kmo, "Ngak a mera el dalam." Me a ldela el ua isei e ngika el buik a kmal mlo ungil a rengul, e dula er ngii el kmo, "Ngak a diak mera el smecher me a klukuk e ak nguu tia el molech el mo choitii."

Me a bocha el tutau e ng ulemkokl el mekiis el nguu tia el molech el ngar er a ulebengelel a ulaol el nguu el mo choitii e mekiis, e le ng diak el secher. Me a rechad er a blil me a beluu a ko er a kmal mlo mechas a rengrir, e le ngika el buik a kmal mesisiich el diak a meringel er ngii.

E te kiei ngii me tirka el chad er a blil e diak louchais el kmo ng mla mo medengeli a meral delal. Ng kiliei el lobengterir me a lsal klungang, e ng dula er a demal er a ta er a klebese el kmo, "Chèdam,

ngak a kmal soak el oumlai me mdesechii a mlik."

Me ngika el demal a ta er a klebesei, e ng kutmeklii, e merael el mo er a ked el mocha melobech er a kerrekar el mo mlil ngika el buik. Ng dilebechii a kekel a charm e mocha tmaut el melasech er ngii. Me se el tutau, e ng mo er a ked, e a lekebesengei, e ng me remei. Me ng me remei e a lebo er a bo el kukuk, e ng mla mengai a bitang, e le tirka el obekul ngika el Ngeleketbudel el chelid a olengeseu er ngii el omachel er ngii. Ngika rubak a di mong me ng di nguu a telkib e a lebo er a bo el kukuk, e ng kuk mla mengai a bitang.


Me te dosechii el mo merek e ng dmue demal el kmo, "Chedam, tia el mlai ng ungil a leme lemengai er a oingerang?" Me ng dmue er ngii el kmo, "Ng ungil a leme lemengai er a ikrel a eru el klebesei." Me a bololecha a sueleb er tir ngika el mechas, e ng oker er a ngelekel el kmo, ng tuobed a mlai er a oingerang. Me a Ngeleketbudel a subedii er aika el tekingel a demal. Me ngika el mechas a okere el kmo

ngar er ker me ker chobo molengull er ngii. Me a locholt ngika el rubak, e ng mocha er a beluu e mo tmaut el ngar er a mesei el mesab a kukau, e mocha mangedmokl a kall el kirel tia el sils el lebo el longurs er a mlai. Me tia er a lemei tia el belsechel omengurs e ngika el mechas a mibii aika el kall el mo er aike el lebo lolengull er ngii a rechad. Me a ltaut ongurs, e te mengurs er tia el mlai er a chelsel a chereomel el me er a taoch. Me a lengar er a melengel a rael, e ng suelebang me te olengull, e ng medechel a kall me te omengur el bek el chad, e kuk lueta el mo mengurs. Me te di milengurs el mo er tial kmal moded e ng mo diak lora el e le ng mla moreked. Me te ouengemek tirka el chad el mengurs el kmal di diak. Tia el chimo beluu er a Imul a di mlo tmurk ongersir. Me a lsal kmal ko er a dikea cheldechulel e te mocha ko er a kedechedechor el rrau a rengrir. Me ngika el rubak a ko er a di ulureuachel el kmo, "Rungalek, ka mei me kuk mongurs." Me a lebekiis el mong el mo orekediit tia el mlai e kmo, "Chedil, Chedam, ka

mochotii er ngak, ngar er ker  
Ngeleketbudel, me ngar er ker a  
Metechelsel." Me a ldu el ua isei e  
tirka el chad a kaichichiis e le tia el  
mlai a ko er a silebek e obengbangl  
el mo er a taoch. Me a loltirakl er  
ngii el mo er a taoch, e ng bliou a  
kall. Me te mo dengchokl, e ng  
mocha er ngii a blengur.

Me a lemerko blengur e ng  
melmesumech er a demal el kmo,  
"Ngak a merolung." Me ngika el  
demal a mo omades a ngeltel, e ngii  
di kmo, "Ng diak ak di merael." Me  
a lorolang e ng millebeakl er tir el  
kmo, "Kemi se el bo meklou, e kom  
kmal mo meringel chad, e ng di kom  
di mo mekerior, e merechorech a  
rengmiu er a kall."

Me elechang, e ng ollachidnger  
el mo er a redil me a rechad el  
kaubuch, e merodel er a rengelekir a  
resechal el kmo, chomoungalek er a  
ngelekel a ochedam el mrirdelii, e ng  
kirem el bai mo klou el betik a  
rengum er ngii er a ngelekem el mla  
er a delem.



## NGIRAILEMESANG

A Ngirailemesang a chad er a beluu er a Ngkeklau er a blai er a Imeong. Ngika el Ngirailemesang a ko er a kmal mle bedektall el chad e dirrek el mle meringel a ochil me ng dimlak lsa el sebecel teloi er a resechelil el ngar er a urretel a Ngkeklau. Ng di mle mesisiich el di mededereborb er a blil e okerker a chisel a mekemad. E tia el urretel a Ngkeklau a omais loumekemad er a Ngial e le ng mle soal melai er a klisiich. E ng di a uleba medal a urrurt er a Ngial a Ngirngemelas el merael a chisel er a blekeu me a klisiich. Me a urretela Ngkeklau a di mo obenged e lmuut el cheraches.

Me a ta er a klebesei er a lleta el cheraches a mekemad me lekaiderurt a resechelil mei, e ngii el Ngirailemesang a reboreb er a medal a tuangel er a blil e okerei el kmo, "Ng ngera chised e sechelei?" Me a ldela el ua isei, e ngika el ta er a rechad a touchekla el mong, e dula er ngii el kmo, "Kau ngera ke di dengarech er ngii, e a rebikel Ngkeklau a ngomeda er a tekingel a

beluu, e kau a di mededereborb e di korir a dmanges me a metengel. Mtobed el mo er a mekemad." Me a lrengesa aika el kmal ko er a meseked er a dingal el tekoi e ng metichekla er a rengul e ko e a kmal chetikol.

A ta er a klebesei e ngii el Ngirailemesang a omdesua el kmo, ak bai nguu ku udoud e mo er a Ngial me a kusiik a cheldechulel Ngirngemelas. Me ng melebedebek er a rengul el ua isei, e mocha kudmeklii e nguu tia el udoud el sukur er a til e mocha er a Ngial. Me a lebong e ng mechiuaiu a beluu me ng omerebart er ngii el mocha er a blil Ngirngemelas. Ng mong me ng reboreb er a medal a tuangel, e olekiis el kmo "Ngirngemelas, Ngirngemelas, udelei, bekiis e ng ngar er ngii a tekoi el kulekoi er kau." Me a Ngirngemelas a mo omkais er a chesimer me ng dula er ngii el kmo, "Bekiis e ng ngar er ngii a tekoi el dekatekoi." Me a ldela el ua isei e a Ngirngemelas a omdesua el kmo ng milkolk me ng diak kdengchii ngika el chad, me ng liluut el ulekerker er ngii el

melangch er a ngerel. A Ngirailemesang a di ngar er rikl e kmo, "Tia udoud." Me ng mocha mekekakil a Ngirngemelas el longchengchii a chesimer. Me ng dirk melai er ngii e a Ngirailemesang a osisebii a chimal el nguu a udoud el loa er a chimal Ngirngemelas. Me a llia er a chimal e ng mocha rulii besul, e mocha nguu tia el chesimer el mo klou e lueta el oker er ngii el kmo, "Ngera chised?" Me ng kmo, "Ngak e chudelei a uchul me ng di klebesei e ak meremang a kmal soak el me mrechau me lemeruul a chisek er a rebeluu er a Ngkeklau."

Me a Ngirngemelas a dula er ngii el kmo, "Mada klukuk me lemei a mekemad, e ngak a ngar er a olechelbelek er a nglas er a Bkulatab, e a lsekum me ng mesngerekl a mekemad e ng di kau a mei." Me a ldela el ua isei e ng kmal mlo ungil a rengul a Ngirailemesang me ng merola el mo er a Ngkeklau.

Me a lebong e ng di mlong el kudmeklii a lidel e nguu a udoud el sukur er a chelsel a lild. Me a lebo el kukuk me ltebeda urretel a

Ngkeklau el mo oumekemad e ng nguu a lidel e remurt el okiu a chei el mengetakl er tia el urrurt er a Ngkeklau. Me a lebocha er a Bkulngerair e ng mesenge a Ngirngemelas el reborb er tia el olechelbelel er a Bkulatab me ng remurt el bedul ngii. Me a lrurt a Ngirailemesang e ng mo er a chelmoll e me remel, e mo er a chelmoll e me remel el merael el me kmeed er ngii. Me a lekeda e a Ngirngemelas a dula er ngii el kmo. "Mokedau e kimiit." Me ng liluut el merael lokedii me a lsa el kmada e a Ngirngemelas a odersii a ochil el mo er bab e kmo, "Momurech er tiang e alii ng mo ngodech a lidem."

Me a ledela el ua isei e a Ngirailemesang a kodekedii a lild er a chimal e mrechi a chereuel a ochil el tmoech er a bitang. E ngii el Ngirailemesang a kmo, "Ordillem er a kar a ngar er a rsel a lild e ngak a merolung."

Me a Ngirngemelas a kmo, "Mada di le kau el ngoikau." Me ng obult e mo remurt e le otoir a meremang. Me a lekelekel el me er a Bkulngerair e ng meseked a



chesechid, e a loker er ngii el kmo,  
 "E rrang ngera chised?" Me ng kmo,  
 "Ng diak ak ko el ouchisung, a chais  
 a merael," e di remurt. Me a lemei  
 er a chelechol e ng dirrek el  
 meseked, e te oker er ngii me ng  
 dirrek el kmo, "Ak ko el ouchisung,  
 a chais a merael," e di blekall el mo  
 er a blil.

Me a lemetat a chais el me er a  
 beluu el kmo a Ngirailemesang a  
 milrechii a Ngirngemelas e a ta el  
 mechas er a remeteet a metengel el  
 me el otkikii a bechil, e ngii a mo  
 bechil a Ngirailemesang.



## MELUADCHEANGEL

A irechar e ng mla er ngii a ta el chelid el ngklel a Meluadeangel el kiliei er a beluu er a Ngcheangel e menga er a rechad. E se el lebo el sengerenger e ng me er a chelsel a beluu me ng mekudir a chad e nguu el mo er se el lengar er ngii e kolii. Me a lsa el beteknga a rechad el mangai er ngika el chelid e a rechad er a beluu a mocha omart er tir el diak el keiei er a blirir, me a diak loliokl a kelir e le te bekikl a loues a chat a Meluadeangel. Me te di oumesingd el menga rodech me a chemadech el kall.

Me a lsa el klunga chelebuul me a klengerenger er a rechad e te mocha kaokedong el mo kldibel e kakerker er a beluu el lechiis el mo er ngii. A rebebil er a rechad el ngar tia el kldibel a dilu el kmo bai di dechiis e kerdi mochu metik er a debo er ngii, e a dengar er tiang e kede nguemed. Me te tilbir el kmo, a milkolk er a tutau e kede mo oldiderekl e merael el osiik er a debo er ngii.

Me tia el melekinga tutau e a rechad el rokui a mlo er a kederang e mocha oltak er a kaberruuch e mo meius el mo bedul a Belau. Tia el tutau er a le bo loldiderekl er a kabruuch e ng mlo er ngii a klaititekangel er a kmo kede nguu ngika el mechitechut el mechas el Delumumuu a ngklel, me a lechub e ng mechoit. Me a rebebil er a rechad a kmo dechitii, e le ng ngika el mechas a mechitechut e di mesobil, me a uchul me te chilitii a kmo, ngtecha mo mendedmokl er ngii er a kaberruuch. Me a rechad er tia el beluu a chilitii ngika el mechas e mo meius.

Me a bocha lodengei ngika el mechas el kmo ngak a mechita er a omerael, e ng kmal mlo mekngit a rengul, me ng lilangel, e kmo, ngak a kele ak mocha kelel a Meluadeangel.

E tirka el chad er a Ngcheangel er a bo loius e te mlo er a Belau el uludesbedall. Me te meius el melengelakl a beluu el me er a Ngchesechang e lomes e ng ko er a sorir ku el beluu me te touchakl me te kiei er a Ngchesechang. Me aike el dui me a beldeklel a klobak me a



deruchall er a Ngcheangel a di lullab  
e ke er tia el beluu.

E ngika el mechas el  
Delumumuu er a lemechoit e ng  
kmal meknge a rengul, e dektel er a  
Meluadeangel, me ng merola el mo  
er a iikr er a Ngerdoko me ng kiei er  
a eungel a otaor. Me ng kiei e kmal  
medakt me ng diak longuml a ngau,  
e di menga chemadech el kall me a  
berdel a ngerel a mlo cherou er a  
omenga el chemadech el kall. Tia el  
chelebuul el le mla er ngii ngika el  
mechas a milkrolui a lusech, me ng  
dimlak el bechiil e mo dioll e  
mechelleterir a rengelekel el teru el  
sechal. Tirka el ngelekel a locha  
lusech a uchul me te di ulemeka  
klebesei el mo meklou.

Me tia er a lemeklunga tirka el  
ngalek, e a ta er a klebesei, e te okere  
er a derrir el kmo, "Chedei, ng  
ngera me ke mekreos er kemam a  
kibo er a beluu el mo milil, me kid a  
di menga a chemadech el kall." Me  
derrir er a Delumumuu a melekinga  
er tir el kmo, "A rengmiu e  
rengelekei ng klebobekel el tekoi a  
dengar er ngii? Kid a uchul me  
kerdi ngar er tiang a milechoit er a

omeius er a lechiis a rechad er tia el  
beluu. Te chilitak e le ng dimlak el  
sorir el mangedmokl er ngak e le ak  
chebuul e mechitechut me ng chetirir  
a kungesang er tir. Me te milechikak  
e kmo becherei me lekeli a  
Meluadeangel. E tir el rokui el chad  
er tia el beluu a mlo meius a  
kaberruuch e omekall el bedul a  
Belau."

E mocha ouchais er tir er a dakt  
me a chelebuul e le bla er ngii me a  
blekerdelel ngika el chelid el  
Meluadeangel. Me a louchisa a  
derrir e tirka el teru el odam a kmal  
mlo mekngeit a rengrir er a derrir e  
mocha melib a kodellel a  
Meluadeangel.

Me a ta er a klebesei e ngika el  
klou el chad a dula er a ochellel el  
kmo, "Kid a mo omngar." Me te  
omngar er a bek el sils el me  
mengudel er a bita er a Ngerdoko.  
Me a bek el sils e tia el cheldull el  
idungel a di milrael mo kedidai. Me  
a lsa el kmal klunga tia el cheldull el  
idungel, e ngika el klou a kmo,  
"Elechang e kid a kuk mo olengakt a  
bad el me mengididai er a dlul aika  
el idungel." Me ng dirrek el mle

urrerir er a bek el sils. Me a lungia er a rengrir a klungel tia el chedull el idungel me a bad e te ulemkokl er a ta el tutau el chumlii a ngau er ngii. Me a lekerda el ngukokl a chat el mo er a bab e a Meluadeangel a di chilsngekl el mesa e kmal ulecherchur e kmo, "Olekoi, a kmal songerenger e aika ng ko er a kall el dirk ngar er ngii." Ng ulediu e mo merael el bedul tia el chat. E tirka el teru el odam a mla dmeu a ochadu e ngmai me te olab e reborb er a bita er ngii el ngau. Me a lora el a Meluadeangel el mo e tirka el teru el odam a mla ngmai a ochadu, me ng di mla er a cheroid e te mesang me te mo midokl aika el oungeu el bad el mo er ngii. Me se lebideklii a chimo el mo e ng sosechii a ngerel el medir er a bab el merekeklii. Me ng di ulemerkakl aika el bad e di olekeed er ngii er tirka el teru el odam. Me a lsa el kmedang e tia el delel a kmal klunga e sokol el mongkangk. Ngii el Meluadeangel a ko er a chilsngekl, me ngika el kekere a kmo, "Ng medei" e a lechub e ng kolekel el mo er a ikrel a Tngel e ngii a kmal mekelda tia el

delel me ng mongkangk a bita el delel. E ngika el chelid a dirk chad, me ng mengelekel el lmuut el mo er a bita er a Ngerkesol e ng kuk mongkangk a bita, e tirka el buik a di mengelekel el okiu ullel. Me a lebo el mo tmurk e ngika el chelid a blengkangk el ulekeuad. Me te mocha sodelii a nguu a delebekul e merael el mo er a Dimes el mo mesubed er a derrir.

Me a lochotii tia el delebekul ngika el chelid er a derrir e ng dula er tir el kmo, "Mnguu el loia er a toluk e mnguu el mo er a Bas e mdu ika el tekoi er ngii el kmo, "Mora el oukeiukl e moudesbedall el osiik er a Rdechor me a Obakrusong, me a Spis, e se el bo betik er tirka el rubak el du er kau el kmo kedelebekul a Meluadeangel e kobsuus, e mnguu el mecheklii." Tirka el ngelekel ngika el mechas a ngiluu tia el toluk e ngar er ngii tia el delebekul a Meluadeangel el mo er a Bas e mecheklii.

Me tia el toluk er a lebecheklii e ng uludesbedall el mo kirel a taoch er a Ngchesechang e ng keriiik me a dolech a nguu el losisebii er a chelsel


a taoch e mecheklii el nguu el mo er a beluu. Me a leme er a beluu e a rengalek a mangedub e mesa el becheleleu el ombibechakl me te mo nguu. E a lebo lenguu e ng diak ledengchii el kmo ngera, e ko er a medekta er ngii e le ng kluk er a toluk. Me te nguu el mo er a bai el le kldibel er ngii a rubak. Me tia er a lenguu el me er tirka el rubak el meseke e te mocha omasech a bek el delebekul a ngikel me a chelid e ng di diak lobsuus. Me te mocha ko er a melebedebek e a ta er a rubak a dula el kmo, "Kele el delebekul a Meluadeangel?" Me te okere er ngii el kmo, "Kau delebekul a Meluadeangel?" Me tia el becheleleu el klalo a di ulebsuus el di mlo kekerei tia el toluk. Me te mocha medengei el kmo ngike el chelid el Meluadeangel a mla mad. E tir a mocha nguu tia el toluk e tir a nguu el mo doklii er a chis er a taoch er a Ngchesechang.

Me a bocha lodengei tirka el chad er a Ngcheangel el kmo ng mla mad a Meluadeangel e te mocha omdasu a rokel a luut er tir el mo er a Ngcheangel. Me ng milekedmokl a

mlai me a kall e te lueta el mo ngmasech er a kaberruuch e mo omkall. Me a lomekall e te mlo er a beluu, e a lebo e te di mla er a cheroid e mesterir a teru el chad el dechor er a chelechol. Me te ko er a melangch e melelchedech el kmo cholebo e kede ririid e ko er a kmal dimlak a chad el kiliei, ng di mle ta el mechas el ko er a kmal mechitechut el locha di durrael e ng mad. E tirka te ngera el dechor er a chelechol. Me te melechedech el ua isei e mocha kmeed. Me a lsa el kmada er a Bas e ngika el kot el klou a melekinga el kmo "Kom di omak er tilechang e olengull el telkib e osiik er a beluu el bo er ngii e le beluu a belumam."

Me ngika el merreder er tia el omerael a tometii el mo dechor e mocha meluluuch er tir. Me ng omasech a betok el tekoi e tirka el buik a di diak lekengei. Me ng dula el kmo, "Becherei me kimeko mkerd, e kemiu el teru el odam bo mngai a omerreder er a beluu. Me kau el klou a mo Obakrusong, me ngilecha el ochellem lebo el Rdechor. Me kau el Obakrusong a mo er a

Dillong (Ngerdilong) me a ochellem  
 lebo lorreder er a Dimes  
 (Ngerdimes). Me a ldela el ua isei e  
 ng mocha ungil a rengrir. Me a  
 beluu er a Ngcheangel a ulebii me a  
 Obakrusong a merreder er a  
 Ngerdilong me a Rdechor a  
 merreder er a Ngerdimes. Me a le  
 ngikel e a Obakrusong a klou el chad  
 me ng menga er a bdelul e a  
 Rdechor a kekerei me ng menga er a  
 kemril. E a roel omerreder er a  
 beluu e a Rdechor a kekerei e ng di  
 merreder er a Ngcheangel. E ng di  
 tirka el teru el rubak a ua leteru el  
 merreder er a beluu er a  
 Ngcheangel. Me a ikaikid ngii el  
 blekerdelel a omerreder er a  
 lemangai er a nglat el me lmuut er  
 elecha el sils.



## OSILEK ME A ORENG

A Osilek a ta er a milrael a chisel el mle merreder er a Ulong el beluu er a chelebacheb. Ngika a kmal mle betok e meklou ududel, e dimlak lebechiil e di mle kiei ngii me a rengengelekel a ochedal. Tirka el ngelekel a ochedal a kmal mle ungil el mengetmokl er ngii me ng kmal mle ungil besul.

Ngika el Osilek a kmal chedal a chei me ng klmochel a derekengel er a cheleched el Biduul a ngklel el ngar er a Kloultoi. Me ng di klmochel a ukedel er a rokui el klebesei el kerreel suld, me ng diak lolengull el omekoad a meklou el uel me a chedeng, e olab el omeka er a ruchedal me a rechedal er a kebliil.

E mla er ngii a ta el redil el ngklel a Oreng el ngelekel a ta el rubak me a ta el mechas er a Ulong. A Osilek a kmal mle soal el redil a Oreng, e meteet el chad me ng oba a iltetel el ko er a di omcheracheb er a rechad. Me ng ouderek er a Biduul e a lemad el chedeng me a lechub e ng uel e ng melekoi er a ruchedal el

kmo, "Kom ngmai el mo er a blil a Oreng e le ng mo bechik."

Ng kmal mlo diak el sebechel el motngakl, e di mle ua isei me a demal me a delal a Oreng a dula er ngii el kmo, "Rungalek, chomko ngera el tekoi e ng sebecam el ngubetau er ngii, e ng di tia a lak lekau e ng diak a chiolel er kemam."

A Oreng a mle kekerei el redil me se el lebo el buil e a rengengelekel a Ulong a mengemedaod a omilil el buil er a rengalek er a Metukrikull me te di blechoel el mo me te milil. E sola e mla er ngii a ta er tir el lekaisisiu a meklungir el ngklel a Mariar el mlo sechelil a Oreng.

Me te tilbir a tekingir el mo kaubuch. Te kmal mle meringel el kaiuetoir me se el lolekoi a demal me a delal a Oreng e ng di lmuk e diak a ngera el ledung, e kmal di melatk er a delongelel ngii me a Mariar el kmal chetil el mo cheroid er ngii.

E a Osilek a diak lomart er ngii e di chemolt a chebul el uel me a chedeng el mo er a blil a Oreng. A Mariar a mlo medengei, mte ng medekta. Ng dikea el mekdekudem

el mo omes er a Oreng. Tia er a bocha el orakiruu el belsechel a omilil el buil e a Oreng a mlong e a Mariar a medakt me ng dimlak lebong. Tiaikid e a Oreng a mesmecha er tirka el ekebil er a Metukrikull el kmo:

"Rikebe chobomriid er a metang er a Oikull, e ke me ngma klmecham el mo dmu, e mkerir ngii el Mariar er aike el rukeuid, e leko er a Ulong a Mariar leme me lodingel a rodel, e rrad a bngel, e ngii aike el bedul er a maml."

Me tiaikid a Mariar a milretii el mong e dmu er ngii el kmo, "A uriul er a eru el klebesei e ke me tuobed er a kederang, e a chomesang a bekall el me tuobed er a Metukerikull el terrechokl a resel, e ke meius el osiueklii, e nguu a tiem el cheluch el ngar er a chelsel a ulengchidel."

A uriur er a eru el klebesei, e a Mariar a nguu a udoud el sukur er a chelsel a ulengchidel e dmu er a ruchellel el kmo, "Kom omekall el di merekmo omesa a mlai el me tuobed er a Ulong e mo kmeed, e mecheklii tia el ulengchidel er a daob, e kemiu

a omechereu el me remei." Tiaikid el udoud a mlo ua el olmesmechel a Oreng er a Mariar.

E a uriur er a sese el klebesei e a Mariar a liluut el mo ochotii er a Oreng, e dmu er ngii el kmo, "Oreng ak mad er a chesebreng, e ke me doklak." Tiaikid e a Oreng a kmal mlo mekngit a rengul er a lrengesa aika el tekingel a Mariar me ng mocha mengitakl el kmo:


"Mariar me ngak a diak kbo kbechil a Osilek el mo meketeket, e le ngii el Osilek a mle melat a ngeltel er ngak el kmo, kau bo monga cheldik el ngikel er a moloachel er a Biduul el ulengesall el olechit er a Mariar."

Te kiliei el sese el klebesei, e ng mad a Mariar me a Oreng a olterka er a bechil el kmo "Bo modengelkak e kbo er a kemeldillel a Mariar." Tiaikid, e ng kmal mlo ungil a rengul a Osilek er a kodellel a Mariar el kmal el loltoir er ngii a bechil. Me ng kilengei er ngii e dmu er ngii el kmo, "Bo mdeklii me a chomei."

A uchei er a lebo e a Oreng a chilsuch a bngal a kelau e ullab el

mo mengabs er a dingal a Mariar el  
 telul. A bocha el merek, e lebo e ng  
 meketeketa er a lebo el belsechel a  
 omelakl me a rechad a di mengiil er  
 ngii el Oreng el me mesa a bedengel  
 a Mariar e mochu melakl er ngii. E  
 ngii a mo me ng kiei e di lmuk, e a  
 lolekoi er ngii, e ng dmul kmo, "A  
 kulengit me bo kbereked er a  
 Mariar, e mnguu a ta er aike el bar el  
 choimkengkak el telkib me ak bekiis,  
 e lomeluosu kung." Me ng mlo ua  
 isei, e ng di tia er a lebo lebad, e ng  
 ngiluu a isngel el mo osechesechii er  
 a chebesal a Mariar me ng medeb a  
 telil el mad el obengkel a Mariar.

Tiaikid e te mocha mesubed el  
 mo er a Ulong er a Osilek me a  
 demal me a delal Oreng, e mlo  
 moterkokl el di mlo chimo a debellir.





## BEKAI ER A OKERDUUL

A Bekai me a Uel a mle teru el odos. Te mle ngelekel a mechas er a Iromel er a Ngetmel. Ng bekl el sils el Bekai a omuut er a ongiong er a medal a tuangel; e a Uel a melebek er a chemrungel. A derrir a di mlengetmokl me ng obisa a rengul. "Ngera ak tilemellii?! A rechad omechell er a rechad, e ngak a omechell a charm! Ng turka a renguk er a omengetmokl!"

A Bekai me a Uel a rirenges aika el ngerrelel a derrir, e mocha katekoi, "Ng mo diak dobengkel a delad. Kede mo osiik a delengchokl."

Me a ta el tutau e te milrael el mlo er a taoch. A lebo e a Bekai a uleker er a Uel, "Ngera mo mlid el dengar er ngii?" "Ng diak dousbech a mlai. Ak mo metengel, e ke me ngmasech er a ulkek, e kede merael," a Uel a dilung.

A Bekai me a Uel a di iliu a bek el beluu er a Babeldaob, e mlo tuab er a kekere el iungs el Okerduul a ngklel. A Uel a dilu er a Bekai, "Bo mkerd. Tia a chobo mkiei er ngii, e

ngak a mo er a chelebachab. Ak mong e mengiil er kau er a ta er a klebesei."

A Bekai a kmal mlo mekngit a rengul. Ng dilu er a Uel, "A lsekum ke mochang, e mo omechell, e ke mo omechell er a beluu me ng diak lemekmad a rengelekem." Sei a uchul me a uel a me omechell er a chelechol.

A Bekai a mlo kiei er a Okerduul. Ng mlo er ngii a ngelekel el ta el sechal, el Remusei a ngklel. Ng di ulebang, e omekeroul er ngii el mo klou el chad.

Ngar er a Imul el beluu er a Imeliik, e a ta er a klebesei, e a Secharraimul a uleldurech er a rengelekel el tede el sechal el mo merad a bub er a Okerduul. A lorola el tede el odam, e a derrir a silkur a teluo el kukau er a chelasir el okurir.

Te millikes el ngar er a melengel a taoch, e a kot el klou a kmo, "Kede mong, e ngike el mo mereched el rodir a chimo el bub el me er a mlai, a di ungil a lekeli a okuid." A kot el kekerei a mlo belalek a medal. Ng mle medengeli el mo diak el



sebechel el kolii a telkib er a okurir, e le ng mle mechitechut e meoud el merad.

Te mlo er a Okerduul, e mlo kerous a leblo er ngii. Tirka el teru el meklou a dilak el mo merad. E a kekerei a milrael el ngii el tang el di medidelangel a rengul. Ng mlo motngeong er a Remusei el dilechor. "E rrang, ngera me ng di belalek a medam?," a Remusei a uleker er ngii. Me ng ouchisa a ldilu a obekul. A Remusei a chubra me ng dula el kmo, "Ak ngosukau el rodir a bngem. Me bo mngai a teblo el ulekngel el a kikoi el mei me bo dechur."

Te rirdir a mlo sebechel a chimo el bub, e a Remusei a cholngii el mo ongesechii er a mlai. Ng dilu er ngii, "Momengur e mongiil er a rubekum, e ak merolung." Me ngika el buik a ulemengur el killii a okurir.

Te tirka el obekul er lemei, e mesenge el dikea a okurir. Ngika el klou a kmo, "Ngera me ak di ulengelakel e kau a mla kolii a okuid, e dimlak molatk er kemam?" Te chileklii a ochellelir.

A lebocha lrei, e te di tiluu er a blai a rubekul, e olengit a kall. "Ng ko er a mla er ngii a okumiu," derrir a uleker. Me te dmu, "Aki ulengelakel er a ochellam e ngii a kolii a okumam." "Ngera me ng di mle kau el tang e kolii a okumiu?" demal a uleker er ngii. Me ng mocha mengedereder a tekingel a kot el klou er a lolikes. "Ke milekerang e kmal mle mereched el rodir a bngem.?" A demal a liluut el oker er ngii. Ngika el buik a ulenger er a demal el kmo, "Chedam, ng mla er ngii a sechelik el ngilsukak."

A bo el kukuk, e tir el odam a mlo melachel a bngir. A lemerema er a blai, e a demerir a liluut el dmu er tir el kmo, "Kom lmuut el mo merad a bub er a Okerduul. E kau el kekerei a nguua sechelim el mei me ak mesang."

Te liluut el mo er a Okerduul el odam, e ngika el kekerei a mlo omes er a sechelil er a Remusei. Ng mlo dmu a tekingel a demal. Me a Remusei a dilu er ngii el kmo, "Mada msall e bo ksbedii a delak." A Remusei a mlo subedii a delal me

ng kilengei. Ng dokngei ngii me tirka el odam el mlo er a Imul.

A Remusei a mlo kiei el obengkel a ongalek er a Secharraimul. Ng bek el sils el lolikes el mo oldingel er a delal. Ng mlo meketeket e ng mocha tuib a ilaot e mocha melenges. A ilotel a mle blechobech er a tkul a rael. A ulebongel er ngii a mla er a tebedall er a Imul er a mo bedul a Ngetpang.

A ta er a klebesei, e ng mlo melenges. Ng mla er a cheteftel se el kmal ulebongel er a ilotel, e milsa a Tkud. Ng mle telechull a cheritel e chelebill er a til el ngar er a omerollet er a Ngetpang el mei. A Tkud a dirrek el milsa a Remusei. Ng milrael el imiu er a uchul a ilaot el lebla er ngii a Remusei e mlo dechor. Ng chilusii a chemachel e uldersii. Me ng metengela a Remusei el nguu ngii el chemachel. Ng millamech e uleker, "Ke mle mekera me ng di tutau e ke meremang?" "Ak mle osiik er kau el me melekoi a tekingel a chebechiil," a Tkud a ulenger.

Me a Remusei a dulang, "Bo er a uchei, e doraal." Te milrael el

mochu er a blai, e a Remusei a dmu er a Tkud me ng mlo dechor er a tmuil, e ngii a mlo mesubed er a Secharraimul.

"Bo mdu er ngii me lemei er a blai. " a Secharraimul a dilu er a Remusei. A lemerema, e a Secharraimul a di milsang e dulang, "Ng soak a chobo mkaubuch." Me a Remusei me a Tkud a mlo kaubuch. E tia el sils er a lebo el kaubuch, e ng medechel a eim el klebesei e ng mo merengel a bechil a demal a Tkud er a Obakratkedesau.

Ngika el Obakratkedesau a mla er ngii a teim el ngelekel el redil. A Tkud a mle kot el kekerei, e dimlak lebechiil. Ng mle kot el meknig el dil er tir el rokui. Ng mle kerkertall a medal me a bedengel. A remechudelel me a rebuchelsechal me a di rechad er a blai a mle mekii er ngii. Ng mle omengedaki, e blil a ngerroel. E aike el meknig el oderuchel er a blai a di lebo er ngii. Ng di kiliei er a olisall.

A Tkud a mle kot el cheleoch er a demal. Ng di ngii a menga a derengel a demal. A demal a mle chubur el kot el kekerei, e meknig a

medal, e diak lebechiil. Me ng ulemeksiberreng er a remechudelel. A lekeda a merengel a demerir, e a remechudelel a mocha dmak e melaes er ngii. "Ngika ng di mesobil, e ngera a mo bleketelel er a merengel a demal." E a rebebil a kmo, "Becherei, e ngika kmal mengelengalek a medal me ng diak el sebechel el metik er a bechil. Kede bai di olderdurech er ngii me ng meruul a urerel a blai." Tiai a uchul me a Tkud a tilobed er a blil. Ng mle blak a rengul el merael el mo osiik a chebechiil. Ng mle merur a lebo er ngii a mur, e lak a bleketelel el udoud.

Me tia el lebo lekebesengei e te mlo bad er a ulengang, e a Tkud a mocha ouchais er a Remusei er a belsechel a merengel a demal. Me a Remusei a dilu er ngii, "Ke mo remuul a chilted el beumk, e mo dobechii a ta er a dui, e chousii a tik el chelititouch." A Remusei a ulemkokl er tia el tutau el mlo melenges, e mlo subedii a Secharraimul er aika el tekingel a bechil.

"Ng oingera a mur?," a Secharraimul a uleker er ngii. "Ng medechel a eua el klebesei e ng mo er ngii." a Remusei a dilung. "Olekoil, tia a kmal kmedang." A Secharraimul a dilung, e tilobed el mlo omed a udoud. Ng ileueklii a beluu er a Imul, e dimlak a lebedir el udoud. Ng mlo er a Ngerkeai. E te dirrek el silmesmechii. Ng mocha er a Elechui er a blil a Rebluud. Ng mlo sebechel el medir a chimo el kluk. A Rebluud er a lenguu el msang e ng dilu er a Secharraimul el kmo, "Tia el udoud a sechal klikes."

A omerolel a Secharraimul el merema er a blai me a Remusei a merema el melenges. A Remusei dilechor er a kliu er a blai el melecherakl a omilel e rirengesii a bechil a Secharraimul el kmo, "Ngika ng ngelekel a terruaol el dil er ker el orretia a Secharraimul me ng di kea bo lekiei er a kingellel."

Ngika el mechas a ulemes er a bechil el di mededudeu ku er a klengerenger, e merema er a blai. Me ng ngilasech a rengul, e dmu el ua isei. A Remusei a di liluk e mle

tmuu er a blai. Ng di mle ungil a osengel el ua bek el sils.

A bo-~~lekukuk~~ e ng tebedel a mur. Me a Remusei a dilu er a Secharraimul el kmo, "A klukuk e ak mo songes a ilotek el mei, e mochu er a Ngetbang." Ng mlo er a ulengang me ng bad ngii me a bechil. Ng metuda a klebesei e ng dula er a bechil, "Mchielak, e kbo kisa a delak er a Okerduul."

A Remusei a mlo mesubed er a delal me ng ngilai a teblo el bekai el mui er a ngais el msang. A delal a childereder a tebedel ngii el udoud, e dilu er ngii, "Aika a kloklem. E a chobong e ng di kea mluut el mei. Elecha el morael e kede mo kebii. Ak mo merael a chereomel el omechell a kelir a remeteet, e mo er a chelebachab el mo osiik er a ta er ngak." A Remusei a ngilai ngii el ngais e milrael.

Ng di mle tutau e ng mo songes a ilotel, e te mocha mengetmokl er tir el mo er a Ngetbang. A Secharraimul a milsa tia el kluk e te merolang. Te ngar er a omerollir el mo er a Ngetbang, e mlo er a chimo el omoachel me te melechong e

mengilt er tir er a beumk, e a Remusei a nguu a sis el dobesii a bechil. Ng di ririid aika el kertall er a medal me a bedengel el di mlo meaiu. Ng mocha omeu aika el ngais e ngilai a udoud er a chelsel. Ng ngiluu a chimo er a klou el bachel el kobsii er a chikl el a bechil. "A debo er a blai e ke mkisii a ulitech er a Obakratkedesau, e kede mo tmuu er ngii, e ke dmu, "Mdertii tia el udoud." A Tkud a mlo er se el klungiaol el dengdengechel ku er rechad. E a Remusei a mle klebokel el sechal e milengal el kmal mlo klebokel.

A Tkud me a Remusei a di dilum er a tmuil e tia el meseked el mekesokes me a chelsel a blai a chilsngekl el ulemes er tir. Ng mlo mechas a rengrir er a klungiolel a Tkud me a bechil, me a klou el bachel el ngar er a chikl el a Tkud. A Tkud me a Remusei a di iliu a bek el tuangel e mlo er a tungelel a Obakratkedesau. Me a Tkud a silebeklii a ulitech e dilu, "Mdertii tia el ngar er a chiklek."

Me a Obakratkedesau a dilertii e dmu, "Bemtuu er tia kau me a

bechim." Me te mocha tmuu el terung.

Te di mlo merek el omengur, e a Remusei a okere a belsel a mur e dilu, "Ak orrechad, e le ilotek a cheloit el diak a chad el omes." Me a Obakratkedesau a ulecholt a blals. A Remusei a kilekad el rokui, e ngiluu a ta el bachel el msang, e dmue er ngii, "Tia a chetul a mur." Tia el seked er a rechad a mlo mechas a rengrir er a iltetel a Remusei. Te di ullab aika el derta el ududir, e di kea loltobed. E a Remusei a mileltii er a bechil e dmue, "Ke kiei, e ngak a merael." A Tkud a dilu: "Ak kiei, e mekerang? Ak obengkem el merael."

A Obakratkedesau a dula er tia el seked, "Aika el kelel tia el mur a chomtuchel el rokui el mo ngederel a Tkud. Ko mo ngoderii er a Imul ngii me a bechil."

A ta er a klebesei, e a Remusei a mocha chuib a omilel e mlo diak lolenges. Ng mlo nguu a ta er a bachel el msa a Secharraimul, e millemesumech er ngii, "A kurael, e ng di kea kluut el mei." Ng dirrek el ullutii a kluk el lebildir a

Secharraimul er a Rebluud e milsa a ta er a kldait e dilu kmo, "Tia el kldait a terekel tia el kluk. Me mluut el mo ngoderii er a Rebluud." A Secharraimul a melulucha er ngii me ng dilung, "Becherei me kurael. Ak ngelekel a terruaol, me ak kiei, e ak di mengesang er kau." Ng di dilu el ua isei, e merael ngii me a Tkud.

A Remusei me a Tkud er a lora el e te millikes el ngar er a taoch er a Ngerusar e a Tkud a dmue, "Ng kmal merengla a bdeluk er a sils. "Msebechii a ta er a rechelel a kerekur me lomderngek." Me a Remusei a silebechii, e ngiluu el msang.

A Remusei me a Tkud a mlo kiei er a Ngerusar er a blai er a Klai. Te ngiluu tia el kerekur el dolemii er a medal a blai. Ng mo meketeket e ng mocha er ngii a ngelekir el sechal. A Remusei a milengeklii el Ochit. Elechang e kede omngakl aike el mekekere el ngelekel a bekai el ochit a ngklel.

A Ochit a di lmangel a lellomes me a leklebesei. Me a Remusei a dula er a bechil, "Kede mo er a Desbedall. Debong, e desa ngeleked

el kmo, ng mo diak el llangel?" Me ng mocha melemesumech er a Tucheremel. Ng ngiluu a chimo el bachel el msa a Tucheremel e kmo, "Ke kmal mesula er kemam. Aki mo merael el mo er a Desbedall."

A lorolang, e a Remusei a ngiluu tia el kerekur. Ng uluusbech er ngii a Tkud me a ngelekel el omtilou er a sils. Te mlo er a Melekeok er a beluu er a Ngerang me te ngar er ngii, e liluut el dolemii tia el kerekur. E a Ochit a dirrek a lengelel. Me a ta er a klebesei e a Tkud a ngiluu el tuobed el mlo er a bita er tia el kerekur me ng mengesekes er ngii. Ng dirrek a lengelel. Me a Tkud a mocha mengesekes el kmo "buil, buil, be mnguu a ngelekem."

A Remusei a rirengesii a Tkud me ng uluungeroel el kmo "Ngera me ke mengesekes er a ngalek el ua isei?"

A Tkud a ulemechad er ngii, e di ulemelekl er a kesekesengel, "Buil, buil, be mnguu a ngelekem." E a lechisngekl a Tkud, e a buil a meremang. Ng di mle el nguu a ngalek me a Tkud me a kerekur el lebla er a uchul me a Remusei el

merael. Se el domes er a buil e ng ngar er ngii a Tkud me a bechil me a ngelekir el ngar er a eungel a kerekur.





## TUCHELIAUR

A Tucheliaur a ngelekel a ta el mechas er a Ngeaur el kiliei er a Ngerchelong. E omerolel ngii el mechas el mo er a Eouldaob e ng milechellii a Tucheliaur me ng tiluchakl er a Ngeraard. Ma el tuchakl er a Ngeraard e ng mlo er a blil a ta el mechas el ngklel a Techur. Me ngika el mechas el Techur a ngklel a ngoura Tucheliaur me ng oungelek er ngii.

Me a Tucheliaur a kiliei e ouchetil er ngika el mechas el Techur. Omerollel el mo klou el mocha sebecel el omtab tekoi e ng omes er a rechad el blechoel el lebo er ngii a kldibel me a omerous el kall er a blai e te olab a dikesir el mei er a blai. Me ng di ulemes e omtab, e a ta er a klebesei e ng okerei er a delal el kmo, "Chedei, ngera me ke rubak e diak kobo er a bai?" Me a delal a dula er ngii el kmo, "Rungalek, ngak a mechas me ng diak el sebecel el teloi er a rubak el ngar er a bai. E diak a klou el sechal el sebecel mo tuchelii a dui el Techur, me chelechang e kau a mo Techur." Me

a ldela er ngii el ua isei e ng mocha mesubed a rengul.

Me ng di mle kekerei e mo tuchelii a dui el Techur. Me a lebo er ngii ongdibel me a cheldecheduch er a rubak e ng mo er a bai e le ng mla mo ta er a rubak. Ng dirrekl el mla e r ngii a ta er a dial el dui er a beluu er a Ngesang el Recheuir. Me ng kiliei er a Ngesang el meluchel er a dui el Recheruir

Tia el delengcheklel er a Ngesang e ng miltengeii a ta el blekeradel el mla er ngii. A rechad er a Ngeraard a blechoel el melenget el mo er a Ngial. Me ta er a klebesei e ng kuk mocah belsechel a omelenget el mo er a Ngial. Me a rechad er a beluu a mocha kudmeklterir e tobeda el mocha er a kederang el mo oldubech a otaor el tenget el mo er a Ngial. Me a Tucheliaur me ng dirrek el mla er tia el omerael. Ng mle telkib el ko er a metacherbesul er a rengul a blekeradel el mla er ngii e le tirka el chad a dibard Otaor e oldubech me ng kmal meringel a e meoud. Me a Tucheliaur a dula er tir el kmo, me me dolemolem aika el otaor e



doldubech me a debo er a Ongiil e dedibard e loldubech el mo er a Ngiual." Me tirka el chad a ko er a di medakt e mocha oltirakl aika el lolekoi a Tucheliaur.

Ongedei er a kuk belsechel a bo lolenget er a Niual e a rubak er a Ngiual a dilu er tir el kmo, "Ko moltak er a rubak el mo er a chei." Me te ulteketerir tirka el rubak el mo er achei, e tirka el rubak er a Nigual a dula er tir el kmo, "Msiik a desengeliu e domengur e dorolu el mo er a beluu." Me a rebek el chad a ngmilt a desengelir e mocha omengur, e a Tucheliaur a kmu er a sechlil el kmo, "Ngak a meles er a smuuch." Me tirka el rubak a rongesii me te dula er a sechlil el kmo, "Msikii a smuuch el msang e ng kuk soal." Ng milles er a smuuch el milteklii e nguu a kemril e oba el merus er a ngerel. E a uldesuel a Tucheliaur a kmo, a lsekum me ng diak kuldiu er a ringel e ak nguu a Ngiual e le tia el omelenget a kmal merengelang. E a ltir el me er a beluu e ng kmu er a sechelil el kmo, "E rrang, kau chomlingir tia el mlai e molikes el di kau el tang e ngak

kulimet e diak derechorch e mo er a beluu." Me te mle kaititekangel el mo el mo e a ta er a rubak a kmo, "Mlingir e rrang." Me ng okor e ngka el sechelil a mekiis el lingir e a Tucheliaur a mocha reborb el melimet e a sechelil a melikes. E a uldesuel a di osisiu el kmo, a lsekum ng diak el rechorech tia el mlai e aki mo er a beluu e ng sebechek el nguu a Ngiual. Ng dimlak a ta el rechorech a mlai e te me er a beluu.

A leme er a beluu e ng mlo olengull er a ta el bad el ngar er a medal a bai. Me ng dengchokl e a ta el mechas a mengelakl e mesang me ng omides er a btelul. Me ng mekiis el mo e okere er ngii el kmo, "Ngera me ke omedes er a btelum?" Me ngika el mechas a kmo, "Tilecha lebilekodir a obekum er a Recheked er ngii." Me ng kuk mtebengii el ta er a tekoi el ko er a metacherbesul er a rengul. Ng ultebedii a tekingel el mo er a rebekl el rubak el kmo "Ng mo er ngii omelenges e le kede mo osiik a udoud." Me te tuobe a rubekul a Ngeraard el mo melenges er a bek el tutau. E ng kmu er tir el kmo, "A lebo er ngii a udoud e kede

melecha er a chelsel a ulaol el bambuu." A ta er a klebesei e te milekiis er a tutau e ng kmu er resechelil rubak el kmo, "Ko mo oldingel aike el lius el ngar er a cheroid e ngak a di ngar er a kmeed e le ng ko er a mechitechut a bedengek." Me a resechelil a kongei, me a lorola resechelil, e ngii a ngmasech er a lius el kmeed er a blai me ng nguu a omail e mereko el lmuut el memetei, e dimlak el luut el mo er aika el bebil er a lius. Me a bel metei, e ng mla mo diak a rechad er a beluu e ng soiseb er chelsel a bai, e mechederiib a ulaol e ngmai a udoud, e solang e mtutii a ngau me ng meseseb a bai. Me a rebeluu er a lesengei tia el ngau e ng tmaut a diu me tirka el mlo oldingel omail el rubak rurtang el mei er a beluu. A lemei er a bai e a ngau a mla milii a bai. Me a ledu Tucher el kmo, a udoud a ngar er a chelsel a ulaol, ng mla mo diak el sebechir el mo ngmai.

Ngika el Techur Techur a kilie el mo meketeket er a Ngeraard e mocha melasech a Kesol el mo teletelel a udoud. A ta er a klebesei

e ng dula er a bechil el kmo, "Ak mo er a Euouldaob ngak me a ngelekek er a Ruchellidel." Omerollir el e ng nguu a ta er a ika el udoud el metechii e kmo, "Tilecha a ududem e kede melai er a Ngial." A luut er tir er a Eouldaob e te mle er a chelebachab, e ngii omdesua el kmo ngika el kmal betik er a renguk el ngelekek a kukodir e ak nguu a Ngial. Ng okor e mekiis el mekodir a ngelekel e chotur. Me a lebocha er a Ngeraard e a bechil a pkere er ngii el kmo, "Rrang, ngar er ke a ngeleked?" E ngii a kmo, "Ngilekid" e melutk er a reaki. Me a ledela el ua isei, e a bechil a ko er a rrau a rengul me ng lueta el oker er ngii, me ng mekiis el nguu a chelais e kmo, "Ngkakid." Me bechil a dula el kmo, "Ngera me a ngeleked a ua isei?" E a Techur a kmo, "Ak milekodir e le kmelai er a Ngial.

A ta er a klebesei e ng mlo omes er a sechelil er a Tmekei el mlo merreder er a Melekeok. Me lebo e ng diak el louchais a chisel e mo tmuu er a blai e mo er a tuangel e di dengchokl el chemau a Ngial. A Tmekei a ngedecha er a rengul me

ng kmu er a bechil el kmo, "A tutau e ak mo er a chei, e kau a mo olengit a chemelem er ngii." Me a Tmekei a dula er a sechelil el kmo, "Ke di kiei e ngak a mo er a chei." Me a lorola a Tmekei el mo er a chei e a bechil a mocha olengit a buuch er a Techur. Me a Techur a midas a chimal e nguu a til e suchesokl el mo er a odesongel me ng di kiliei er ngii el choielii a Tmekei el me er a kebesengei. Me a lemei a Tmekei e a bechil ouchisa er ngii el kmo, "A kullengit a buuch er ngii e ng midas a chimak, ngilechakid er a lengchokl er tilecha el odesongel er a tutau el me er a chelechang." Me Techur a dula er a Tmekei el kmo, "Ngak a merael er a tutau me ke mo ngoderak er a ked e kede mo kebi me ak merael."

A bocha el tutau e ng nguu a cheremel malk e te merolang. Te milrael el mo er a ta el ked el ngar er a Ngial e mocha kiei, e a Techur ouchisa el kmo, "Ng diak bo lengodech a cheokl er ngar er a renguk. Ele bek el sils e ak di omdasu er a Ngial." Me a Tmekei a dula el kmo "Chelechal el mei el

orakiruu e kau a ngar tilecha el mei, me ngak a ngar er tiei el lekong." Mete mocha durur a malk er ngii e omengur. Tia el ked a mlo "Ollaol Malk" a ngklel. Tia er a lebo er a Ngerard e ng omdesua el kmo a lsekum ak mukelii tia el ukall, e chusuch a llel, e ak nguu Ngial. Ng okor e mocha mukelii tia el ukall, e chusuch a llel, e ak nguu Ngial.

Ng rirenges a chisir a reteru el odam el Klasekl me a Kladikm el kmo te kmal beketaut er a burch. Me a ta era klebesei e ng mocha nguu a ta er a kmal klou el ududel e merael mo er a Ngertuker el beluu el ngar er a delongelel a Ngeraard me a Ngerd mau. Me a lebo er a blai e ng di ta el mechas el derrir tirka el teru el odam a ngar er a blai, me ngika el mechas okerei er ngii el kmo, "Ngera e Techong me ke meremang?" Me a Techur a kmo, "Ak me melai er a rengelekem el mo mekoad er tir. Me tiakid a bedengir a rengelekem e ak melai er tir. Me ngika el mechas a kmo, "Tirka a dibus el mlo er a chei e dirkak lemei. Me te ko er a dirk chadecheduch e ngii a kosebaki a biskang e

merderodech el mo soiseb er a blil, me ngika el mechas oldiu e kmo, "Rengelekei, ngile Techur e lak mongerodech." E tir a kmo, "Ng techa el chad a Techur?" Me a lebe lsiseb er a blai tirka el ngalek, ea Techu a mocha nguu a chelasir el mocha meruul a chederir. Me a mechas a dula el kmo, "Becherei e Techur e ak mo meruul." E ngii a kmo, "Ng diak, becherei e ak remuul. Me a Techur a kmal mo mechas a rengul er a ika el chederir tirka el terung el di ike el melechesokl el ngikel el ua bolobel me a sekos, el di blurch a btelul er rokui. A derrir a mocha ouchais er tir el kmo, "A Techur a melai er kemiu el mo er a mekemad." Me a louchais a derrir e t kmal mle semeriar el mo er a mekemad. Me a derrir a mocha nguu a tetuk el blabuk e ngoura el mesterir e kmo, "delongelel a Ngial me a Ngerard a ngar er ngii a Kesebekuu, me se el bo e be lultom a kesebekuu e kom nguu tia el blaluk el tukeklii e mrechii me ng mad." Me a bo el tutau e te ngoura tia el blabuk me a

lidir e obengkel a Techur el me er a Ngerard.

Me a lebo er a beluu er a Ngerard e te mocha omesebes er a mekemad. Me a lebocha el meketmokl a urretel a Ngaraard e ng touta mekemad er a bo lekukuk. Me a Klasekl me a Kladikm a mle keltmokl el mo oba medal a urrurt. Ng ulemuchel a mekemad er a daob el merora el me el me er a beluu. Me a lemei er a beluu e a Tmekei a kuk mla er a ulebengelel a beluu e oumekemad el melsiuekl er a rechad er a Ngerard. Me be lekebetech er a belngel a beluu, e te mechitechetong a rechad er a Ngial, Me a Tmekei me a Techur a mocha omii er Ngial me ng mlo diak a beluu er a Ngial. Me a le mesisicha Techur me lebo er a Ngerard e ng dula er a rubekul Ngerard el kmo, "A lsekum ak mad, e ng diak bo kmechiuaiu er a debull. Ak di mo dengchokl el chemau a Ngial. Me aika el klekedellek er a mekemad a di mo delekull er a bita er ngark."

## CHEREALLBTIL ME A RRUSBEDENGEL

A Ngesias el beluu er a Beliliou a ngar er ngii a klou el ii er ngii. Tia el ii a Irirs a ngklel el lekiei er ngii a Meluadelchur el chelid el menga er a rechad er a bek el klebesei. Me tia el beluu er a lsa el kesengei a rechad er ngii, e te mlo osiik a mo okedellel ngika el chelid, e ng di dimlak el sebecbir me te mlo osiik a rolir e chemiis el mo cheroid el olibngokl a bedengir. Me te mocha mengetmokl er tir me a mlirir, e mocha oldiderekl el chemiis. E ngar er ngii a ta el mesobil el mechas er a kebliil er a Irirs el mlo kudmokl a klokkel e mo er a taoch er a Ngebungel el mo melidai a mlai el chemiis. A lolekoi er a rechad el ngar er aika el mlai el kmo, "kulidai", e te di okemetii e melekoi el kmo, "Mongiil er a ngar er a uriur." Me ng di mle ua isei, me a lekea mlai e ng kmal meknkite a rengul me ng lueta el me remei me ng di omerebart er ngii, e diak loliokl a kekel. Me ng di olsengerenger, e kiei e mocha dioll er a ketengel, e mechell el sechal, me

ng mengklii el Rusbedengel. E kiei el mo meketeket, e lueta el mo dioll e mechell el sechal me ng mengklii el Chereallbtil. Ngika el Rusbedengel se el lengasech a rengul e a bsechel a bedengel a mo ko er a derudm. Me a ochellel er a Chereallbtil a lengasech a rengul e ng mo er ngii a ko er a orsul a chum er a idekel a btil. Te kiei tir me a derrir el mlo meketeket.

Tirka el chiliis a mlo er a Meungs er a Oreor el di ullab a dirir el lulluchel el mong, me te medesii a klobak e kiei el di olab a deruchellir er a le ngar a Ngesias e kiliei el ungil beserir. E ngii el mechas me a rengelekel el teru a kiei. A ta er a klebesei e a rengelekel a okerei er a derrir el kmo, "Chedei, tia el beluu ng di kid a chad er ngii?" Me a derrir a dula el kmo, "Rengelekei, ng diak el ungil tekoi aki mla er ngii. A uchul me ng diak donga ngeliokl el kall a medakt er a Meluadelchur a leues a chat e lemei." Me a rengelekel a kmo, "Bo leklou a rengum e aki mo mekodir."

A ta er a klebesei, e te mocha er a taoch er a Ngebungel me te ngar er

a did el blechobech el teru el odam el omikel a uloi e mengitakl, e a Meluadelchur a mochang. A Rusbedengel a klou me ng kmal mlo tmeu a rengul a Meluadelchur e kmo, "A kolemiu er a chelechang, E mlo omdecham er a Rusbedengel e ngii a ngosecha a rengul me ng mocha tekokou a orsul me ng di mlo diak el medelodel a bedengel, e ngii a dmua er a Chereallbtill el kmo "Murrerii." Me ng mo mengibechib a Chereallbtill el morekedii el tuketkur el mekedusii. E te nguu a delebekul el loia er a orsachel e chudechedechar el kmo, "Chobo motechakl er tirke el mla chad er tia el beluu e lomasech a delebekul a rokui el charm me a ngikel, e ng diak mo bkuuk. E ng di a ldu el kmo, ke delbekul a Meluadelchur, e ke okbkuuk el di mo mekerekerd er tia el orsachel. "Me ng mlo ua isei me tia el orsachel el oltak er tia el delebekul a Meluadelchur a ua el ngar er ngii a ulumekrael er ngii el di ulsiik er tirka el chad el mla er a Ngesias, e chiliis e choitii a derrir. A lebo el betik er tir, e te mocha nguu el mei, e mocha oker a ker er ngii. E

ng di diak el lomkuuk, e tir a dongchia tia el orsachel me te ko er a di uluungelakel el kmo, " Ng delbekul a Meluadelchur." Me tiaikid e ng omkuuk el mo mekerekerd er tia el orsachel. Me te mocha katekoi el kmo, "Ng ungil el bododngelii a beluu el kmo ng ua ngerang. "Me te mocha katekoi e lueta el mo er a Ngesias. E a lebo e tirka el teru el odam a omais e mla tometemii a keburs el chomkemkelii a taoch me ng diak el sebecir el me tmua er a taoch. Me te ngar er a ikrel a taoch e meluluuch el kmo, "Aike el mo somiu er a beluu el derechuall me aike el rokui el mo somiu aki bo er ngii leko er kemiu." Te di chiloit a ngelterir el mo er tir el teru el odam. Me a derrir a dula el kmo, "Rengelekei, merekong, e dekengei me leme el siseb e te chebulang."

Me te merma soiseb, e liluut el medesii a delengchokl el mlo ua smechele er a rechuodel. E te di mlousbech el ua lulubedul er tirka el teru el odam me a derrir. Tirka el ongalek a mlo kuoll er a buai e mlo tengetongel er a rokui el omeruul el



ngeltir a rebeluu el mo er tirka el  
tedei el ongalek.

Me a klechubechubechad me a  
klaokerreu a tekingel a beluulechad  
el ietekiil el tekoi.





## TULEI MA SURECH

A Tulei a chad er a kebliil er a Tublai er a Ngebuked er a Ngerard. Ngika a kiliei er a Ngarard e orrenge a chisel a Surech el redil er a Ngercheluuk el bita el beluu er a Ngial. Ngika el Surech a di mlechell, e diak a redil el ua ngii er a klungiolel, me a rebek el bikel a Ngercheluuk a kmal el nguibes er ngii. Me ng dimlak a ta el chad er a beluu er a Ngial el rokir el diak el lodengelii. A ta er a klebesei e a Tulei a dirrek el di oba ngakl el kmo Surech er a Ngercheluuk er a Ngial a kot er a ungil el redil, me ng ulumekekebesei e milrael el me er a Ngercheluuk me ng bad er a Bairabelod. E di mle tutau e ng mekiis er a bai me ng reboreb, e ngii a tobeda er a kederang, e merael er a chelechol, e a lesang, e ng di milsang, e ng kmal kltukl, e le ng kmal mle ungil redil. Ng diak a chetid er ngii. E a loker e te kmo ngikaikid a Surech. Me ng mera el mlo diak le kilmeklii a rengul me ng mo er a chelechol er a loraal. Me a Surech er a lesengei e ng kmal mlo

chubur e le ng mera el mlo er ngii er a rengul me a bedengel a chad el oltoir er ngii, me ng di mle ua isei e a uriul e ng mocha melekoi a tekingel er ngii e kmal melat a ngelter er ngii. Ng kilengei me te mlo dmak e tibir el mo kaisiuekl er a ked el olab a kelir. Te kiliei el mo diak a kelir, e kuk tuib a telbilir, e me remei, e melngot a kelir, e kuk mo kaisiuekl er a oilolir er a ked. A lrengenges a Madrengebuked el obekul a Tulei e ng kmal mlo mechas a rengul. A Surech a kmal el merael a chisel, e a Tulei a mocha sechelil. Me ng klou el chais. Me a ta er a klebesei e a Madrengebuked a okere er a Tulei el kmo, "Aika el kurrenges el tekoi ng mera el tekoi?" Me ng dula el kmo, "choi, ng merang." Me a Madrengebuked a dula er ngii el kmo: "Omluut el mong, e ke nguu el mei me ak mesang." E a Tulei a rengul a kmo, ng mo mokodir e nguu a bdelul el mei. E a lechub e a Madrengebuked a ulemdasu el kmo, ngika el Surech el kmal merael a chisel, ng ua ngtecha el redil, a Tulei a mocha


ousechelei er ngii Ng mle soal el mesang.

Me a lebocha losiu er a ongedukllir er a ked, e te kiliei el ngilai a betok el klebesei. Me a kelir a ngomeda me te di menga a rdechel a chersachel. Ng mle meringel er a rengul a Tulei el dulii tia el tekoi er a Surech. Me a louchisang, e te dengchokl e a Surech a dula er ngii el kmo, "Olekoi, tia ng klteketel ngar er a rengum e di lmuk el me er elechang?. Bo mdobech aike el llel a demailei el mei, e kchusii a chelasem e ke mo merserasech." Me ng mocha duobech a llel a demailei el me msang me ng mengaus er a chelais e mesebech er ngii er a bdelul el momerek, e doiir e mocha mengitaki el kmo,

"Ngera ko merael er ngii a retelingolel Ngial el melechel oacher er a medal a Belod, e Tulei me ke roteria renguk a le cheluib e tengetengel a klsau me a kleald a tour me a kelekolt a duchar, e ng kau el ta el chad, ng diak mchub a di dongerem el bad er a ked el di

ousesechelaod a rdechel a chersachel. E Tulei ng chelebuul.

Ng di chilteklai tiang, e mo bad el ouchiull er a risel a kelel a charm e a Tulei a nguu a bdelul el sukur er tia el lulengaus er ngii a Surech el chelais, e merael. Me a lebo er a Ngebuked e a Madrengebuked chileklai el kmo. "Ak omes er a ngar el chad. Ng diak kumes er a ulekeuad. Mnguu el choridau." Me ng ngourang e chemiis el remiid.



## RECHULUCHEL

A Ngerebkes a blai er a Ngermasech er a kmal rechuodel. Tia el Ngeremasech a beluu el ngar er a delongelel a Ngardmau me a Ngeremlengui. Me ng ua el teleuidel el bita el beluu er ngii a mo er a Ngeremlengui me a bita el a mo er a Ngerdmau, el di mla ua isei er a rechuodel el mei er a elechang. Me ng uleketmokl er a kmal rechuodel ma remla chad el rubak er a Ngeremlengui ma Ngardmau. Ng ngar er a ked el mo er a daob el mo lmuut er a chelmoll el oliochel er a Ngeremlengui me a Ngardmau. Me ng medechel el tekoi el me er a elechang el beluulechad me te di medengei a remklou me a rengalek. A blai er a Ngerebkes a le kiliei er ngii a ta el rubak me a ta el mechas el mle kaubuch. Te milechellii a di ta el ngelekir el sechal me te milengeklii el Rechuluchel. Ngika el ngalek a kmal di mle tang me ng kmal mle cheleoch er tir el teru el obekel. E te kiei el kmal el ungil mengetmokl er ngii el mocha klou el mocha sebecel el obengkel a demal

ngar er a chei. Ng kmal mle ungil beserir e le ng kmal kedu er a blai me a beluu. Me a rechad a kmal chemat er ngii me a resechelil me te dirrek el kmal smau er ngii e le ng ungil el chubechubchad e bekokuui e ungil a tekingel. Me te kmal smau er ngii a resechelil me ng blechoel el ongdibel a bita er ngii er a resechelil er a di omilil er tir. Ng moiuai a ngerel el ungil a tekingel. Me te kiei, e a demal a mocha smecher me ngii me a delal a di kiei el oba a demal me a blirir a kmal di meseked er a resechelil el osiik er ngii er a di omilil er tir. E ngii a diak el Isa el tuobed, e di oba a demal ngii me a delal, e a kerior er tir e ng medei a demal. Me ng kmal mlo mekngit a rengul ngii me a delal. Te mocha siungii e mo doklii el di ngii me a delal. Te kiei me a resechelil a di oumesingd el mo el mo mengelim er ngii. Me te kiei el kmal mlo meketeket el mocha sebecel mo er a chei, e le ng mla mo klou el chad me a resechelil mei me te kesedem el mo er a chei el di oltirakl a omerellel a demal er a lekiei.

Me aike el lemla er a chei er ngii a demal a di loltirakl el ngar er a chei er ngii. Me ng kmal melemed er a ngikel me se el lemei e ng omeke a obliil e di oltirakl omerellel a demal. Me ng mlo bechoel el mo er a chei, e meoud el mei me a delal a lora el mo dibus e ngma ongulel el locha er a bub el lomech er ngii. A de mei el ngar er a chei er a irechar e a blil a kall a rruul el bub el ua bub er a ngikel e ng di bkeiikl a bebul el domkais e melchang e melai a kall er ngii. A delal a medengeli el di blechoel el tuobed, e diak el sbedii a delal, e merael me a delal a kmal suebek a rengul a lak okouil a lora el. Me a delal a meruul okuiil e melecherakl er a orecheklel er a blai el derorom er a blirir. Ng blechoel el melai me ng mlo bleketatkl er ngii el orecheklel a kelel a ledibus a delal. Me ngii a di kltmokl el telecherakl el mengiil er ngii. Me a loilil ngii me a resechelil e se el lemei e ng mo imuchet okuiil e mo melikes el mo er a chei. Me ng blechoel el meruul el ua isei me ng ko er a uleksau ku er ngii, me ng milil e a leme e ng di

kltmokl okuiil me ng di me el mo melikes.

A ta er a klebesei, e ng ngila okuiil e mo tuobed el mo er a chei er a klebesei el di mla er a medal Ngermasech. E a eolt a mle dimes el di chilitii el meringel el locheloched okul me a lolikes me ng diak. E a rechuodel e a bek el mlai a di ngar er ngii a derse teluo el tebechel el omech a bechoel el tekoi. Me ng mo nguul a tebechel el mo me ng meham me ng dellemakl a uchul, e chelemuul er a melengel. Me ng di uleba me ng di kea e ngii a remiid.

Me a loske er ngii e te mocha metik a okul el lloched me a tebechel a cheretuk el dellemakl, e ngii a ririid. Me a lemei el sbedii a delal e ng kilo ng mad er a klengitelreng. Me a remechesil a Ngeremasech a ulenging el mo er a Ngerebkes me te kiei el mlengelim er a dela a Rechuluchel. Me a resechil a Rechuluchel me te mlong.

A le ngar er a medal a demal me a delal e ng kmal mle kedung. Me a le kldibel e bocha lolturk er a sis e ng mlo bleketakl el ua isei.

Me aikaikid a ulengoklel a Ruchuluchel el cheselsel:

1. A rikebil Rebkes a melngoeoch a klebngir e di ourengreng er kau e Rechulong, a Rechuluchel ng mlor ker. Aika chusel odimel el di telechaerakl er a blai el me ngiil.
2. A di lak lemei Rechuluchel e ngak a smecher ma kmo milak er a lemetat e chemetii a ingukl el di melatk er a Rechuluchel a lak el luut.
3. A di lak el luut el me ngma chusel odimel di ngar er a bub el mo bekngiuk.
4. A Rechuluchel e rebang a di tangerkoi el di diak a titiul e mocha er a omerael.
5. Ma kbo kengelakl era ike el ongdibel er Rechulong e te meseked er ngii a resechelim e doroakl mo er bab e ngukokl meriou e diak rengesii a ngerem me ng di mekngite renguk e orrechd el merael.
6. Ma bo kengelakl er a ike el loremuul er Rechulong e te meseked er ngii a resechelim a dorouak mor bab e ngukokl meriou e diak rengesii a ngerem me ng di mekngit a renguk e orrechd el merael.
7. Te liriu er kid ma dik ma oak el meloched ma tebechel di mecheseb ma koll rekid ma bingedakl ma chelebuul.
8. Chelebuul e melecheda oak el ngurd lokul a kesulab ma lemengeo tebechel er a mereched el kodall.
9. Mereched el kodall le ng melechesulik a debel ma ngar er a kedesomel a mei ma ngar er a kederaol a mei a mei me ngosiu kesebakl ma renguk a rokerek.
10. A renguk a rokerek e ngii a sils a mochu riou ma dolech a mesmesei ma tebechel ngar er a orebakl leruol chelemuul e a uchul a ngeliil ma kmochu melecha er a tebechel chelebuul.
11. Ma lemengeo tebechel er a medal Ngeremasech e Rechulong a kmo diqi bom dechor me mocholt er ngak obeduul el blil a oak el kebesei el kmo ngar ker me ker el methed a mo er ngii a medal a okuk e ng mo mellomes.

## MELAMITOI

A Ngchemiangel er a Beliliou er a lemengai er a mekemad me le meterakl e te dilanges el mo er a Ngchemiangel er a Imeliik el rengedel a Ngerkeai. Te ngar er ngii el sumechii a delengcheklir, e kiei e dirrek el di oltirakl a telbilir el mo mengol er a Oikull el rengedel a Irrai. Te ngar a Ngchemiangel er a Imeliik e mo mengol er a Oikull. Me a lebung a klomengelungel er a Oikull e lemetouch a cherroakl me lebo el mutebechel a remengelngir a reklobak e a delal a Melamitoi el redil er a blai er a Ngesiliong a mlo mengelngel a Ngirchoiaol.

Te kiei e a lemerko klomengelungel e a delal a Melamitoi a mlongebet el mocha bechil a Ngirchoiaol. Te mocha kaubuch e kiei el mocha meketeket, e ng mocha dioll er a ketengel. Ng kiei el mechucher a bilel e mechellang. A lemechell e ng sechal, me ng mengklii el Melamitoi. Te lmuut el kiei el mo meketeket e ng lueta el mo dioll. Me a lemechell e ng redil me ng mengklii el

Kerungil. Te kiliei el kmal dmeu a rengrir el obekel e le ng kmal ungil a beldeklel a cherellir el uluukot er a sechal e a ongerual a redil. Me te omekeroul er a rengelekir me lesa el meklungang el mla mo sebechir el ileakl a delengcheklir, e ng mlo er ngii a ta el kerior er a delengcheklir el mlo smecher a derrir el kmal di mle mereched el mo er a kodall. Te kmal mlo meknig a rengrir, e mocha kutmeklii, e mo doklii. E tir a kiei tir me a demerir el mla mo sebchir el ungil mangedmokl er a demerir. Me a demal a Melamitoi a ungil besul. Ng a mocha mecherar a kebel a ngelekel, e le Oikull el beluu a ta er a oungeuaol el beluu. Me te kiei e ng mocha ongos el belsechrr a remo oungeuaol, me te mengetmokl a kebir a rebek el chad e mo tuobed. Me a Melamitoi me ng dirrek el mengudel er a kebel, e otebedii el mo er a meang el koi, e mengiil er a tekingel a Ngirachitei el merreder er a Oikull, e le ngkeikid a melamioi er a remo oungeuaol me a lechub e ng diak. Ngkeikid a oltobed er a tekoi, e te oltirakl er a telbiil, e mo er a ngouaol, e a lak, e ng diak. Ng lruul



el tekoi er a rechuodel el ua isei el diak lebo lengodech. Me a lebo er a belsechel me ltobed, e te di oltiraki er a kaeb el lengar ngii ngika el melamioi el diak lebo er a uchei er ngii me a diak lebo loeak a kedesomel er ngii. E le otaor el losiik a oba ngikel el diak dechelebii e le ng mo diak a ngikel er ngii. Me kid el mo oungeuaol a di mo diak denga ngikel el rokui, e diak a ta el kaeb el mo ungil. Ng lruul el tekoi el ua isei me a rebek el mo oungeuaol a klebadel a dingerir el ua isei. A Melamitoi a ketengel mo oungeuaol me a rengul a kmo, ng ua di omenged el di de kakerous a tebeded, e di kid el osiik a cheldid. Ng ngilasech er a kedesomel e remurt el chueleb otaor me ng di mlo diak a ngikel er a rokui el kaeb.

A Ngirachitei a kmal mlo kesib a rengul me a lemeremang e ng kmal mlo meringei el choklii a Melamitoi e dilidichii el kmo, "Ngelekel a mengol er a Beliliou." A Melamilo i a miltord e otekir a ochedal er a Kerungil el mo er a Ngersuul el mo msa Ngiramouai e kmo, "Ngika ochedak me loderchelem, e ngak a

mo remei er a Beliliou e le te mla didichak." Ng kiliei el milsuub a tekingel a urrurt el mo medengei e mocha remei er a Beliliou.

Me a lebo e ng mlo kiei er a Iretech el blai el mo soiseb er a kebliil er a Ngesiliong. Tia el kebliil a mla kaingemengemed a rochell er ngii me te di ulechell el sechal me a redil a klekar er ngii el delengchokl. A telechull er a Itbik el dui er ngii el kebliil me ng mle ulechell. Ng mle tekoi er a rechuodel el ngike el mo tuchelii a kebekuul a mo er ngii olechotel. Ng mo melobech er a bai er a klobak, e mo rubak. A Melamitoi a di ngii el ta a medengei el kmo, ngii a ochell e diak el sbedeterir, me te di cheleuid er ngii e le ng mlo klou er a ta er a beluu e mei me ng diak a medengeli. Se el lemeseked er a bai er a Ngermululau el rubak, e melobech er a miich, e ngii a kmal chetil a dikesel a Itbik a lenguu el mo er a ulechell. Me ng smaod a lidel, e merael el mo sibeklii a ubeng, e mereberii a deliukes, e dirrek el diak losubed me a rechad a kmo, "Ng dengerenger e kedidai a



rengul," e a lechub, e te diak el lodengeli.

Te oske a cheldechulel a kodellel, e ngii a milsuub a rolet a mekemad me ng meduch. E a Beliliou a ngar er ngii a Ngirakidel me a Chedebedangel me a Chedemeseb. Tirka el tedei el chad a kuk medal a urrurt er a Beliliou el lousbech er tir a Beliliou el rokir. Tirka el chad a medekdakt a rengrir er ngii e le ng mla tmuu el mektekterir me ng di kea kmu tekingel er ngii. A mechas er a Ngerbeluu a ulderchii a oderchelel el mo er a Ngerkebesang er a Ngiralulk el meduch er a uloech, me a lebocha otekil e ng mocha ngiltii er a delongelel a ulechel, a di mle teluong, e ngu, e te mocha omekall. Me a lebong e ngika el mechas a kmo: "Rungalek, ng kmal suebek a renguk, e ke ngu a di teluong?" E ngii a kmo, "Ng di ungil, e ng di a tutau me lepo er a besechel e a ta er a rengalek a mo ochotii e ng mekngit a de mecheuid." Me a bo el tutau e ng mocha er ngii a diu er a chemtochet el loleongel er a beluu, ng rirengesii me ng kmo, "Ng meremang." Me a

Ngiralulk a dulang, "Mechas, ng diak el sebek a rengum e le me ta er a rengalek me bo lochotii." Ngikekid a chomdak el mong." Me a mlo olecholt er ngii a di mle cheroid e kmo, "Ngilechakid." Me a Ngiralulk a chitutii a uloech er a chetkongel e kmo, "Bom du er a mechas el kmo, bo mesang." Me ngika el mlo olecholt er ngii a kmo, "momoech, me kisang e bo kusubed."

Me a Ngiralulk a mechii el di silbechii er a uchul a tul me ng di mlo ubuu. Ng dimlak el omadel er a balech e kmo, "A obedelii e ak mad." E ngii a mocha Itbik me ng di mlo mesang e te mocha kaiueturk a chesols, me te mlochu medengeli el kmo ngii a ochell.

## SECHOU ME A TUKIDOLECH

A Ngerdorech a mla taoch er a kmal rechuodel el mei er a elechang el diak el delbochel el taoch. Ng btil a Ngerdok el uchul a lmel a Babeldaob, el ngar er a belngel a ked el ngar er a delongelel Ngkeklaui me a Ngerdmau me a Melekeok. Ng omebaoch el me metengel er a beluu er a Ngersuul me te melim, e melecholb er ngii. A lebo er ngii a chull el eim el klebesei, me a lechub e ng betok el klebesei, e ng mo medeel a ralm er a chelsel me ng me tuobed a imui. A ltobed a imui e ng merael el mo tuobed er a Ngerdorech. Tiang a taoch el merael mlai me a bilas el me tmuu e tuobed er ngii. A imui a mengiut me te outaoch a rechad.


Tia el taoch a lekiei er ngii a ta el kekemangel el tukidolech el ko er a kesebekuu er a kereker. Aika kuk di chermel aike el btil a omoachel me a uchul me kede kmo tukidolech. Ng di olab a ngerel el ultom er a bebul a dolech e se lebo el blengkangk e ng ngobeet, e a leme a dolech, e ng me

tuobed. Ng di oba ngerel el di mengiroir er a dolech. Ngika el tukidolech a rirellii a blil er a eungel ongedukllei a sechou. A sechou a bek el klebesei el lebad er ngii e le ng ongedukllei. Me a lechei e ng kmal ungil tmuu er a ngerel ngika el tukidolech. Me ngika el tukidolech a di kea el losiik a kelel e kmal di kiei el menga a dechil a sechou. Ng kmal ungil a rengul, e smonga er ngii, e mocha medengeli. A belsechel a lemei er ngii ngika el sechou me ng kmal mla mo medengeli.

A ta er a klebesei e a Tukidolech a meluk er a dolech el mei er ngii ngika el sechou. Me ng kiei el songerenger e mengiil e ieta er a belsechel me ng kmal mocha ngodech er a rengul me ng tuobed er a blil e mocha merael el mo er a Ngesechisau el melkesokl el ngar er a delongelel a Melekeok me a Ngiiual. A lomes er a sechou, e ng kmal mochu meieleb er a dolech el rosngung. Me ng mochang. A sechou a dula er a tukidolech, el kmo, "Mei e moluluch er ngika el kim me lechitii a ochik e a kmal

rosngung." Me a tukidolech a mocha meluluuch er ngii, e ngii a kmal di klikmechur, e kmal diak el lechitii. Me ng di milluluuch e a lekeang e ng dula el kmo, "Becherei, e a bo dekakngit e ng di ungil." Me ng dochercherii a kemril e nguu el titir a ulechel me ng obok. E a sechou a nguu a ochil e te riedang.

A "chullukel" el belkul a tekoi a mlengai er tiang. Me ng belkul a tekoi el kmo, "Ng ngosecha rengud me kede melekoi er kau, e kau a di ocherechur, koucharm?"



## TEBRUCHEL

A Ngerkeam a rengedel a Ngeremetong el beluu er a Ngarchelong el lekiliei er ngii a ta el rubak me a ta el mechas el mle kaubuch. Te mechellii a ngelekir el ta el sechal me te mengeklui el Tebruchel. Te kmal mle ungil mangedmokl er ngii er a lekekerei el mocha klou el chad. Me ng kmal mle ungil beserir. A omerollel ngika el buik el mo klou el mocha medengellii a rengul e ng mlo bechiil er a ta er a beluu. E a lebong e te kmal mlo ungil er ngii er a rokui el omeruul el mo er ngii. Me ng di ulebult el mo chemau a bechil, e mochudo er a demal me a delal, el rengul tia el le ngar er ngii a ungil tekoi. Me ng melemolem er a rengul, e obeso er a mo oldingel er a demal me a delal.

E ngika el rubak me a mechas a kmal mechitechetong me ng kmal mekngit a chelebulir er a delengchokl. A blirir a chemersang me te melabek er ngii er a keai e di oleiu a durech e diak a idengilir me te di olsiu a ulaol er a teliang. Te di

kiei er a telengodech el ulaol e a teliang a mla mongkangk me ng kmal mekngit a chelebulir.

A Tebruchel a kiei e a bechil a dillang me ng kmal kosenga rengul er a bechil me ng kmal di kea el letkii a mo remei er a blil a demal me a delal. A ta er a klebesei e a bechil a kmal mesengsengchang e kmal klou a chei, e chederrich me ng tilobed el mo er a chei. Ng kmal ngilemedii a ngikel. Me tia er a ldibus e ngii a mechell a bechil el sechal a ngelekel, me te obtii a bechil e ng mo er a chelsel chebill. A lemerema el mla er a chei, e a delal a bechil a dilu el kmo, "Bo mriso a bedengem, e me mesa ngelekem el mla mechell el sechal." Me a lemei, e bo el nguu a ngelekel el mei, e ng kmal di ulemes er ngii, e longelang. Ng dimlak lolekoi e lmuut el nguu a chelasel el tuobed e mocha remei er a blil a demal me a delal. A lebong e ng kmal mlo mekngit a rengul er a lesa chelebulir me ng kmal meluluuch er a delal me a demal e mocha mangedmokl er tir el mlo er a ulebongel er a kodellir. Ngika el

Tebruchel a ngiluu a llechul a rengul  
er a lesa ngelekel el tolechoi.



## MEDUU ER A NGIBTAL

A Ngibtal a beluu el mla er a ongos er a Babeldaob el ngar er a delongelet a Melekeok me a Ngial. Tia a ta er a ulungoaol el beluu. Me a chedeng el ngikel a kmal kelir, e oterullir el kmal meringel a cheral er aike el diak el oungoaol el beluu. Ng sorir a rechad el omechar. Me a loungoaol e le mei e lengemedii me lebo lolterau e ng kmal meringel a cheral e le ng kmal kengbokl, e le ng diak el di le ngar er ngii er a rokui el klebesei.

Ng ta er a elolem el buil, e ng ngar ngii a ta el oungoaol, el belkul a ngar er ngii a ta er a ta el rak el di se el lobol bleketakl el kmo a eolt a mla mo ongos el diak lora el uchul. Se el lemeringel a eolt e ng di ngirke el chellimosk el chad el medengeli e mekudem el oungoaol a okiuechei el mo oltobed er a mlai el mo er a meang el koi. E ngii a mo subedii a ngoaol e mei, e a lsebechel e ng meterakl er a beluu el kmo, moltobed a kaeb el mo er a meang el koi e kede mo tuobed er oingerang. E seikid e te mangedmokl a kaeb a

rebek el chad e kerous melasech a tet, el mekekerei el ko er a bai, e mo meluluuch er a chederir er a bek el keblirir el olengit er a kmo, ak bo er a ngoaol e lak metemall. E momeklusech er kemam me ki mereched el metik a otaor er a ngoaol me ki mereched el ngomedii. Tia el nglunguuch el mo er a delsachel el ko er a bai a di tekoi er a debo er a chei er a ngoaol e merekong. E le ng ktekudel el omenged, e ng di se el beluulechad, e ng mle lechekisakl a mlai, el tekoi er rechuodel e dimlak le chitel.

A ta er a klebesei, e ng mocha ongos me te tobada el mo oungoaol, me toketa chudela a kaeb, e mochu belsechel a mo er a ngoaol, e a reteru el odam el chad er a Ngibtal a dirk el mildasech a kebir me ng dirk oberoed. Ng mle ketengir el mo melanges er a resel a kebir, me te mlo teloi er a remo oungoaol. Me te milrael el teru el odam el mong, e kerior, e te milkedii a eolt me ng kmoll a kebir el mo chebecheb. Me te ulebechakl. E ngika el klou a kmo, " Ak chibngii a desomel el meskau me kobang, e bo dekakerous

e ng mekngit a dedak e demad. A bo de kakerous e a lta a ta er kid a suobel." Me ngmai a totau el mekur er a chelechedal e mak el osiseb er a olotoang er a desomel e le ngika el obekul a meringel a rengul er a kaeb, me ng di mle blengodel er a kaeb. Me te mocha kebii el mlo diak el kaodengei.

A ochellel a le ngiluuu a berius el moiuekl el mo otungii er a taoch er a Ngerdekus el kmal di sesei ku a telil me a chimal a di obedebedechakl er a desomel. Ng ulak er tia el desomel, e omtitechakl er a taoch e a ngalek er a Ngerdekus el redil a merema melai a daob el mo er a odimir, e mesang me ng mocha me ng dokeuui, e okisii a bdelul el odoseb a telil me ng mesang, e ngii a mo remei, e subedii a demal. Me a lebo demal e ng mocha nguu el mei er a blai me ng measurech er ngii e omekang er ngii me ng mocha mesisiich. E a loker er ngii e ng ouchisang.

Ng kiliei el obengterir el telkib el taem e mocha bechil ngika el ngelekel ngika el rubak. Te kiei el mocha meketeket e ng mocha

melekoi a mo remei el mo er a Ngial ngii me a bechil. Me a delal me a demal ngika el redil a ulekebai er tir el kmo, "Ng kmal cheroid me ng diak a mo sebechel el otireklau e kau a di mo kau el tang." E tir a di merechedang er a omerollir, me a delal me a demal a mocha nguu a selibech el sis e rullii e msang ngika el ngelekir el redil e kmo, "Tia a omobang el ua lochedam e lengusem. Me se el bo se el beluu e ke mesa teluk el rechelel a ngii di el kerrekar me ke nguu e nguu a ulsouechel kim el locha ralm er ngii e silekii tia el ditmechei er ngii, e aike el molengit a di mei er kau. E diak mosubed er a bechim." Me ng mlo ua isei. A lebong e a blirir a ngar er ngii a meduu el teluk a rechelel me ng ngiluu e mo meruul el di ultirakl a tekingel a demal me a delal me ng mle tuobed aike el rokui el soal el lolengit.

Me tiaikid e ng mlo er ngii a cheldechedechal a Meduuribtal el ourodech a ngikel. Me tiaikid e a remlo klechedaol er a Ngibtal el chad er a Ngermechau me a Ngebedechal me a Ngerbekuu mlo



mechechei er ngii. Aika beluu a mlo  
dmak er a mekemad er a Ngibtal e a  
daob a mlo ngu u er a uriul.



## BIIB ME A MATKERUMES

A kmal rechuoðel e ng mla er ngii a ta el mechas me a ta el rubak el mle kaubuch, e milechellii a ngelekir el redil el kmal diak a ungil redil el ua ngii. Me a delal me a demal a mengeklii el Biib. A di osisiu el rak er a lemechell a Biib er a chelsel a di osisiu el buil, e ng mlechell a Matkerumes er a Ngeanges el dirrek el kmal ungil el sechal.

A omerollir el mo meklou, e ng di mle tir el mo kaodengei el kmo kemam mlechell er a ta el buil, me a klungiolir a di mle tir el mocha medengei. A Matkerumes a mocha omais el mo er a Ulong el mo er a blil a Biib. A demal me a delal a Biib a kmal mlo sorir a klungiolel a Matkerumes. Ng kmal mlo ungil a rengrir a demal me a delal a Matkerumes er a rrenges.

E te kiei el mo meketeket me ng kmal klunga a Biib. A Osilek el merredel er a Ulong a mocha dmu er a oderechelel el mo er a demal me a delal a Biib el kmo, "Kom kudmeklii

a Biib e nguu el mo ngoderii er a blik e aki mo kaubuch." Me a demal me a delal a sorir e le ng meteet me a ududel a meklou, me ng kengbokl a blekerdelel me a iltetel. E ng di bedengel a kmal chuodel el chad. Me a lolekoi er a Biib e ng kmal di diak er a rengul me te di melekoi er ngii e kmal diak lebong. A demal a Biib a mocha smecher me tobang, e a Osilek a omub er a Biduul me ng melai a meklou el uel me a chedeng, el chebul el mo er itia el seked er tia el lesecher a demal a Biib.

Me ng di mle ua isei el kmal mesaul me a lemedei me le bocha el kemeldiil me ng dirrek el kmal betknga a cheldil, e a delal a di ngii el ta me ng di kea cheldechulel er ngii. Ng dula er a Biib el kmo, "Rungalek, a demam a kiliei me ng mla er ngii a telkib el ultekenged er tia el tekoi, e ng di elecha el lemedei a demam, me di le kau me ngak el teru el redil, e ngera a ultekenged er tiang, ke le kerdi oltirakl a lolekoi a Osilek, me msemesmechii a Matkerumes e desa tiang."

Me a Matkerumes er a lsbediang, e ng dilu el kmo, "Choi,



kabecherei el telkib e dongiil er a rsel tia el chebechieliu." Me ng mlo ua isei me a Biib a mocha kongei a tekingel a Matkerumes, me te mocha kaubuch a ngii me a Osilek. Me te kaubuch el kmal mocha meketeket, e a Biib a di diak lebo el ungil er a Osilek, e le ng kmal chuodel el chad me ng bechil el di bechil a ududel, e a rengul me a bedengel a di ouketui er ngii er a rokui el klebesei.

Me te kiei e a Biib a mocha smecher el chebedes a bedengel me a Osilek a mocha mengeroid er ngii er a bita er ngii. Me a delal me ng dirrek me ng di ulemeka er ngii er a blai me ng di keang. Te rirellii a blil er a ulis er a mekesong e omeka er ngii me a Osilek a mla mo diak lebong. A bedengel a mla metemall el mengebengabek me ng diak el soal a delal a lokerker er ngii a rechad. E a chisel a mocha er a Ngeanges me a Matkerumes a rongesang. Me ng kiliei, e a ta er a klebesei e ng mocha melikes el mo me ng kmerd, e mekur a mlai, e mocha er a blil a Biib. Me a lebong e loker er a delal e ng dilu el kmo,

"Becherei e lak kobong," e a Matkerumes a kmal meluluuch, e olengit er ngii el kmo, "Di kbong." Me a delal Biib a kmal di kea telekengelel me ng dula el kmo, "Mada di bo mesang, e morael." E a Matkerumes a uleba ditmechei er a lebong me ng ngiluu el mo er a diosech me ng tochelbii el kmal di mlo diak aika el chebedes er a bedengel el ua lliluut el milechell el di mlo diak. E te mocha katekoi er a kmo, "A dora el mo engelakl er a blai, me a loleker a delam e kede mong, me a lechub e kede mo dechor e orrengeles er ngii." E a Biib a kmo, "Ng diak bodetab me a diak dolekoi er tir, e di merael el mo melikes." Me ng mlo ua isei me a belengelakl, e a delal oleker er tir, e tir a okor e di merael. Me a delal a tobeda el okiuellir. Me a bo el diderekl er a mlai, e ngii a mo metengel er a daob, e obengterir el merael, e a lechisngekl a Biib e a dolech a merema er a chiklel a delal me ng sobeka rengul a Biib me ng dula er a Matkerumes el kmo, "Deluut el mo kmeed er a delak," e a delal a dula el kmo, "Di lebo er tia e

mesekak e ak tuchelbaki el mo kim  
me a omechell e ng diak monga a  
kim." Me a Matkerumes a olti a  
mlai e a lolikes el mong, e lomes er  
ngii e ng di tilechelbaki el mo er a  
eou e obult el mo kim. Me a lebong,  
e ng mla mo kim me a Biib a dula er  
a Matkerumes el kmo, "Ak mo  
bengkel a delak." Me a Matkerumes  
a kmo, "Ak mo kerrekerul tia el  
bkul a chelebachab." Me ng mlo ua  
isei.

Me a doucharm a Biib, e ng diak  
dolab kim el me er a blai e le ng  
delal a Biib. A le mei er a blai a kim  
e a cheremed el biib a mad.



## MLECHEI

Ng mla er ngii a ta el mechas er a Ngetbong el beluu er a Ngardmau el kmal ngklei a Techod e a dui el di lulluchel er ngii a Mlechei. Ngika el mechas a luluungor er ngii a chelid el Sechaltbuich. Me ng kiliei el mlo meketeket e ng mocha bechil a Sechaltbuich. Ng mlo dioll ngika el mechas e kiliei el mechucher a bilel e mechellang el sechal a ngelekel. Me ng milengeklii a ngelekel el Ulecherungel. E te kiei el mocha klou el chad el mla mo kirel mo bechiil e le klungel a mla mo sebechel el ileakl el blai. E a Mlechei a mle bechil a chelid e mocha dengerenger er a chad el Elibiong a ngklel. Me te ulemart er tir e a chelid a di mla mo medengei. Me se el lebo el kebesengei e ng oungeroel er a bechil el kmo, "Molatk er a Ulecherungel el klungang, e chad me ng chebuul a le ngar er a blai, e de kaungeroel e lorrengees er kid." E a Mlechei a kmal di outekangel. Me a Sechaltbuich a kmo, "Lak moutekangel a tekoi a dolekoi, e di morrengees, e moruul." E a Mlechei

a di outekangel. A ta er a klebesei e a Mlechei me a Elibiong a bad er a ongebitel er a blai er a Lmii, e a Sechaltbuil a mo me nguam a medal a Mlechei, e lochotii er ngii e merael. Me seikid e ng mlochu diak loutekangel a Techod e di mlo lmuk. E seikid el beluulechad e a Ngerard me a Ngardmau a ua leble el chimo el beluu. Me a ngeiul a Ngerdmau er a mekemedil a Oreor e a Urdmau el bita el beluu er a Ngetbong a dimlak lebong e ng di a uriul e te mlong. Me tiakid a cheselsel a Arbedul el ulelturk er a Beouch el kmo:

A di de ngar er a bai e rubak e ak didil a kelulau el mo er a Ngeruau e Beong, e chad er a Rudimech el bita el bai er kau me a lo maiuai a kelulau e ng robeta sesei er ngii me ko mo kaidiuid. A di dengara bai e rubak e ng dimlak mocholt er ngak a meteu el kelulau me kliluk el mourard. Me a bede mesumech e doruul tekeungel.

Me aikakid el erung, e seikid e te merema mesumech el ko er a mekngit a delongelir.

Me te kiei el mlo mekeketeket, e a Mlechei a melekinga er a Elibiong el kmo, "Kau se el di blechoel dmak kau me a Ulecherungel el ngar er a chei e elechang e ko mo kakerous. Ng diak mdak." E ngii a rechad er a Ngarard a telbiil omengederir el mo udirekorek er a toachel er a Iuekako. Me a rechedal Ngardmau a mlo mengesiau er tir e le Iuekako a toachel el omibiong el er a Ngarard me a Ngardmau. Me a Mlechei a mlengelech el er a Elibiong el kmo, "Ng diak ko bo er a chei kau me a Ulecherungel." E tir a mle medengei e urael el chelid me ng tilobed el elolem el mlai el mong. Me a lebong e te mo kakoad er a chelmoll. Me te milekodik a Elibiong me a Ulecherungel. Me a le medei me lometitechakl a mlirir, e aika el eua el sakt el mai er a Ngardmau a mocha mriked a uak er ngii e cheltekil el me tmuu er a taoch er a Chemuul el mei er a Iuekei e mocha mesubed er a Mlechei me ng lilangel e mo er a taoch er a Metemetang.

Me aikakid a cheliteklel er se el beluulechad er a lemad a Ulecherungel me a Elibiong el mlengai er isei e medechel me er a elechang el kmo:

1. Ng uoi kebesengei me ak melouch er a bab er a kedrekall e okiu a rael e oldiu el chemat el di diul a blelau me ak dechero me ak mengelekel ku chais e te kmo aike eua er a mlai me a aike eru el omekella er a ngeraol mo melengel er a di tela el bikel Ongedechuul.

2. Ng ko el ngak me techa di choruakl eru el langel mo er a Iuekei er a di teru el soilekelam el di medei.

3. Kele di kau a melemed a tekoi e Elibio me a tang me debad er a ongebitel er a Lmii me dollach er kau el kmo kele bochur olikar, a Uchel a mle er a kebesengei el di kodengak e oker er a Elibiong.

## NGIRATUMERANG

A Imul el rengedel a Imeliik a mla er ngii a Ngiratumerang el chad er a kebliil er a Uchelkeiukl. Ngika el chad a ochell me ng ngar er a bades er a mo Rengulbai el chad, e mlechell el diak a ungil el chad el ua ngii. Me ng ngalek, e te di olengamech er ngii a rebek el delal a Imeliik. A ta er a klebesei, e ng kmal klou a chei el ched el cheldecheos, e ched el ngebard e a Ngiratumerang a ulebengterir tirka el ledilak el chad e a loker er ngii e ng dmu, "Ngak a Ngiratumerang." Me totekir el nguu el mei er a Oreor, e mocha subedii a Ibedul me ng dilu el kmo, "Mnguu el mo er a Bailiuaiu me loba remengol." Me ng mlo ua isei me ng mlo er a Bailiuaiu e a remengelngir a reNgarametal el cheldebechel er a Oreor el ulebang. E ungil el chad, e dirkak lebo el sechal me ng di obengterir a remengol. E tir a kiei e mocha dunedngii a ilamrokl el ngikel er a ochil a Ngiratumerang el ulekekltkir er ngii. E te kiei el mocha meketeket el klebesei e a Ibedul a mocha nguu a chelebucheb

el olsisebel er a Imeliik, e dmu er a recheldebechel el Ngarametal me ng tilobed a kabekel e totekir a Ngiratumerang el mo okerdii er a Imeliik. Me ng kmal mlo ungil a rengul a Rengulbai me a kebliil er a Uchelkeiukl el ua lemlad a Ngiratumerang e lueta el me chad el ngiluu a chelebucheb el osisebel er a beluu er a Imeliik. Me tia el chelebucheb a kmal diak el cheleuid a roel e le ng merael er a ulekerreu el ungil budech er a delongelel a Rengulbai me a Ibedul. Tia a tekoi er a rechuodel el mei er a elecha el diak lebo lengodech.

Me ng kiei a Ngiratumerang el dirrek el di kiei a birir a remengol er a bai. Me a lebo lomenged a mekemad me lengar er ngii a urrurt, e ng semeriar el soal el mong. E a remengol a meringel a rengrir er ngii el Ngiratumerang me te di mo obuut er ngii e omart er ngii er a resechelil e kmo ng dibus e le ng chetirir a lebang. Me tirka el sechelil a Ngiratumerang a ko er a kmal mechechei a rengrir er ngii er a klungiolel el olrekodel er a remengol el diak lebo el cheroid er a bai er a



remengol el diak lechitii. Me tirka el sechelil a mo oumekemad e a le mei e ng kmal mlo chetirir er a lesa me te mlo melitech er a remengol e mo kursii el mei e tucheiur a katerul a chimal el kmal di mlo bertemitem er a decherir a resechelil. Ng kmal mlo mekngit a rengul me ng tilobed er a delongelir a remengol el mo remei. Ng mlo nguu a kaiul a dalem el buuch el me me ng cholbii e milii tia el miltechui el chimal e mesebesii el mo diak lemekedoked. Ng remiid el mo er a Ngersuul el mo mesuub a tekingel a urrurt er a Ngiramoai. Ng kmal mlo meketeket el dimlak a ta el lechoit er ngii el di ngilai el rokui. Me a olsemel er a mo melai a tekingel a urrurt el di meluluut er ngii a rememelai a di luldak el ngmai a el dimlak a lluat er ngii. Me a Ngiramoai a kmal mlo dmeu a rengul er a Ngiraturang me ng dilu er ngii el kmo, "Ochellek ng kmal di kau el ta a ngoio el lokngemed. E a rebek el chad a mla me melai, e ngar er ngii a ulekebesel. E kau a kmal ngoio el okidang. Me a ulochel chomngeo el tekingel a urrurt. E a mekemad a eko er a

Imeliik er a me tuab el klou el chei er a llomes me molauch a lidem e lomech er isei el lekong. E a uchei er a ta el klebesei er a lekong e ke ouked el mei e echikung, me ak mengiil." Me ng remuul a lidel e medechel cherul klebesei e ng mochang. Me ng dilu er ngii el kmo, "A lekong e ng di meterakl er a tochel a Imeliik me ke di oltaut el lmuut el osiuekl er aike el klubed." Me ng silemecheklii el mlo ua isei. Me a kot el letuu el diu er a Okerduul e ng ngotaut e te odiur me ng ngmasech er a uchulamiich me ngoltaut e ngmasech e te odiur er a Ngerdesaol me ng oltaut e a mekemad a cherechesang.

E a chais a kmo ka mosiik er a uleltaut el kmo ng techang, e te kmo, "Ngiraturang." Me a remengol a osiik er ngii, e ngii a mebeabed el ko er a remurt el omukrengukl er a chelsel a beluu er a Imeliik el rokir er a blekengel me a klungiolel. Me a uriul er tiang, e te dula el kmo, "kilo komilecherei me ng kuk di chad er a redil. Aika ng dokngei el rokui el chetengakl el mo er ngii, e kemiu a mekerang."

Me a ulengoklel a Ngiraturang el rebetii el odengesel a blekengel me a siichel a kmal betok el ngii a ochotii el kmo ng mera el merutech el ua isei.

1. Telbenged el mekemad a kibis el ngar er a lbengele me Okerduul ak meremech a kar er a chimak e mulumk er kau er a rongel a cheos e Ngiraturang. E koba brotoch me tengadik e llild el merirt er ngii er a kereker e klasekl er a lebong e kladikm er a lemei el ungil bisaol.

2. Telbenged el mekemad a kibis el ngar er a lbengele me Okerduul ak meremech a kar er a chimak e melumk er kau er a rongel a cheos e Ngiraturang. Ngdo el cheluch a mechebelang e a belngel a ulkum er a temlengel a taoch, a kirekir me a diu me a blotk er kau e bekekeuoi mesiich.

3. Telbenged el mekemad a kibis el ngar er a lbengele me Okerduul ak meremech a kar er a chimak e melumk er kau er a rongel a cheos e Ngiraturang. Ng dos ng chelid a merema metel melamuch e merderd er kau er a belngel a

kerker, kirekir me diu me a blotk er kau e bike keoui merikl.

4. Telbenged el mekemad a kibis el ngar er a lbengele me Okerduul ak meremech a kar er a chimak e melumk er kau er a rongel a cheos e Ngiraturang. Ng dos milngakl el kelat a lidel Ngermid er a bedengem me a kmo bike bomdechhor lokokau loiui loiit a lildir a rengaramengai e be mngai aile limelem.



## MADACHELBAI ME A UCHULACHETIU

A Merudal a blai mo er a kebliil er a Tebelak er a Ngetbong el beluu er a Ngardmau. Tia el blai a le kiliei er ngii a ta el rubak me a ta el mechas el mle kaubuch er a lemekekerei el mocha mechuodel, e kmal diak a ta el ngelekir e kmal mechitechetong. Me ngika el rubak a mocha katekoi ngii me a bechil e mocha rodellii a ngelekel ochedal ngika el rubak el sechal el Medachelbai a ngklel me te ulungalek er ngii er a lekekerei. E ulemngrird el mocha klou me ngika el rubak a mocha olsisechakl er ngii er a tekingel omelenges. Ngika el rubak a kmal soal el msa tekingel omelenges el diak a ulecheueklel, e le ng chebedel a kesol er ngii. Me ngii el rubak a oleisech el kmo, "Alii ng diak molekoi a ngodech, ke di oltirakl ak dilung. A chobo mngodech e ke metemall." Me ng kmal di oltirakl aike el osisecheklel oktemelel el mo er ngii me ng olab el tekoi. A mechas a mlo smecher el mad. A Mdachelbai me a demal a

kiliei el teru el ongalek el di ungil beserir er a udoud, me omenga er tir me ng kmal di ungil. E a ta er a klebesei e ng merema tekingel a ta el mechas er a Ngerutoi er a Ngertmau el mellakl me ng mesobil e oba ngelekel el Uchulachetiu a ngklel. Me a lemei e ng dilu el kmo, "Bong e mongiiil a tekingek." E ngii a kiei e mesbeda er a Medachelbai el kmo, "Rungalek aika oderechelel a mechas el mei el melekoi a chebechiil, ng mekerang? Ke subedak." Me a Medachelbai a kmo, "Chedam, ng diak le meknigiti. Ngak a soak me di molai a nger er a ruchedam me te kongei e ng di ungil." Me a lekatekoi e ng mlo ungil el ua isei. Me te mocha kaubuch. Me ngika el mechas a ngiluu a ngelekel er a Uchulachetiu el mo soiseb er a blai el mo bechiil. Ngika el mechas a diak lsa el ungil a rengul, ng telkib el bechelechelingaol a rengul el diak lsa el modak.

Me te kiei e a mechas a melngot a kelir. Se el loliokl el mo merek e ng remous el mle kakerous a oruklir. Me a rubak me a ngelekel a mechas

er a Uchulachetiu a osisiu a oruklir. E a Madachelbai a lomeka er ngii er a obei. A Medachelbai a mle medengei e ng di outekangel el menga a ngar er a oruklel e diak louchais er a demal. Te kiei e a ta er a klebesei e ng mleliokl a derrir e mecheuid e ngma obei el smuk er a oruklel a Uchulachetiu el ngelekel e ngmai a ungil el kukau el locha er a oruklel a Medachelbai. A Uchulachetiu a mlilil, e merema el kmal songerengera me ng tmuu el otebedii a oruklel me omengur e a bo el chemur e ng obei me ng nguu el subechii er a kboub. E a bo el nguu a teluo me ng dirrek me ng nguu el subechii er a kboub. E a Medachelbai a melad er a olsengel el mo mesubed a ilaot me ng dechor er a derorem er a blai er bita er a demal e kmo, "Kau bo mchermii, kau bo mchermii, kau bo mchermii a oruklel a Madachelbai." Me a demal a kmal mlo meklou a medal e kmo, "Rungalek, ngera aika el molekoi? Mororem er a oles e ng dimlak kulsisechakl er kau aikang." Me ng mocha kmeed er a demal e subedii el kmo, "Ngak a di menga obei er a

rokui el sils. Me a delak a locha mlecheuid me a uchul me a Uchulachetiu a chetil menga me ng olab el ometech er a kboub. Me a uchul ak melekoi el kmo, "Kau bo mchermii a oruklel a Madachelbai a melekoi el bedul a Uchulachetiu." Me a lrengesa demal, e ng kmal mlo mekngit a rengul er a ngelekel me ng dilu er ngii el kmo, "Rungalek, ke mo ngma a chidudes el mei e mo mesa a ongelolem er a ulaol, e nguu a blus er a techiir e meketii e ngmai a udoud e smuk a chidudes er a chelsel e mechei e di oungechad er kau." Me ng milruul el mlo ua isei. E te kiei el mo meketeket e ngika el rubak a di mle koterekokl a kodellel el mad. Me bocha el kldibel a ruchedal e bo el kakereker e ng kmal diak a medengalii a blil ududir el ongalek. E ngika el mechas a medengalii e diak lolisech er ngii. E di dengchokl er a bebul tia el ulaol el ngar er ngii tia el blil a udoud.

Me te kiei e a uriul er a lemeterekla a rechad el di mocha ngii el tang e ng mocha nguu tia el blus el techiir. E a bo lenguu e ng

dita el udoud a ngar er ngii e ngii a  
di chidudes a kluk er a chelsel.

Me tia el belkul a tekoi el kmo,  
Kau bo mcheremii a oruklel a  
Madachelbai, a mlengai er tiang. A  
belkul a kmo: A doungelek a rechad e  
ng diak a olitechel er a klengelakel. Tia  
ngar er ngii a cheselsel el mo er a  
rudam el kemangel e ungil el  
ollachidnger.



## NGIRNGEMELAS ME A OBIRIRIR

Se er a irechar e te kmal mle betok a rechad er a Beliliou e ng di resechal er seikid el taem a kmal mle mechitechut me a uchul e te mlo mechitechut er a mekemad.

A kuk Ngeaur a mla er ngii a reteuid el kmal mle mesisiich e bekeu el chad er a mekemad. A ngklir a mle Ketord el di blechoel el se el lemei er a Beliliou el mei oumekemad e te di mesisiich me te melai a bterrir a rechad el mo er a Ngeaur. Ng ko er a dimlak a mo ungil rolel e bo el sebechir a rechad er a Beliliou el mo mesisiich er a mekemad.

A rechad er a Beliliou a mla remenges a chisel a Ngirngemelas el kmal mle bekeu el chad er a Ngial. Me a Obirrir el redil er a Beliliou er a kebliil er a Ngesiliong a dula er a rengelekel me totekir el mo er a Ngial el mo osiik er a Ngirngemelas el mo olengeseu er tir er a mekemad. Tia er a le bocha er a Ngial, e te milsa chad el reborb er a chelechol el melechotech a suldu. Me

ngika el chad a oker er a Obirrir el kmo "Ke mla er ker el mei." Me ng ouchisa er ngika el chad. Me tiaikid e a Ngirngemelas a dula er ngii el kmo, "Hall e bo kriso a bedengek e dora el mo er a beluu me desiekii ngika el chad." Me te di milrael el telkib e ng ua se, "Tiakid a blai e ngak a Ngirngemelas." Me a lebocha er a blai e ng ouchisa er a Ngirngemelas a blekerdelir a rechad er a Beliliou. Me a ldu me ng mle omes er ngii a soal a lebo lolengeseu er tir er a mekemad. A Ngirngemelas a bechiil, me ngii me a bechil a mle chadecheduch er a omerollet a Obirrir el mei er a Ngial. Tia el kebesengei, e te mocha remuul a berrir e mo bad er a ulengang el terung. Te mlong e liluut el chadecheduch er a di osisiu el blekeradel. Tia el tutau er a lemei er a blai e ng dilu er a bechil me ng remuul a okurir el mo er a omerael. Ng uluchais er a bechil el kmo, "Ngak a merael el obengkel a Obirrir e lek mo olengeseu er tir er a mekemad.

Tiaikid e a Ngirngemelas a mocha kudmokl a klekedellel er a



mekemad e te merolang. A tekoi a di mla mo er a Beliliou el mo mesubed er a rechad er a beluu me a rubak a mlo er a bdelulachang er a Ngetkouang e mengiil er tir.

Tirka el rubak a kmal mlo mechas a rengrir er a lekerd ngika el chad e le ng melechedoi e chebedes a ochil e di omekiaes. Ngika el chad a ngiluu a chemadech el ngikel el lochetii er a ochil. Tirka el chad a ko er a oumededenger el kmo, ngera uchul me a Obirrir a melai er a rubak e diak lenguu a kekerei el chad.

A bocha el kukuk e tirka el teuid el chad er a mekemad el Ketord a ngklir a merema er a Beliliou. A Ngirngemelas a ngar er a kederang el melecholb e mengilt a cheluch el mengididiich a bedengel e mesterir tirka el teuid el Ketord el meremang. Tirka el Ketord a ko er a kmal mlo kasoues e ko er a rrau a rengrir le ng kmal dirkak a ta lesa ngika el chad.

Tirka el chad er a beluu a mla mei me te berrotel er a dulul a chudel er a chelechol e omditm er a Ngirngemelas. E ngii a mocha

merek el melecholb me ng kmal beches a bedengel e kmal chedidiich.

E tirka el Ketord a mirrechii a biskang el mo er a Ngirngemelas me ng a kmal mle mereched el nguu a ta er a lidel el ouetelel e nguu a imo el mrechii a ta er tirka el Ketord, e lmuut er a ongerung me ng mrechii. Me ng milekodeterir a reteua er tirka el Ketord e a rebebil er tir a ulebult e obekall el chemiis el mo er a Ngeaur.

Tirka el chad el mle blart a kmal mlo mechas a rengrir me tulemdasu el kmo, ngika kmal dirk kekerei el chad, me ng kmal mlo ungil a rengrir e ng di lmuut el kmal mlo ungil a rengul a Obirrir. Ngika el chad a ngiluu tia el ta er a lidel el dolemeklii er a chelechol e dmu er tir el kmo, "Tia el chelechol a bo momekedong er ngii el kmo Ngial." Elechang e te dirk medengeli a ngklel tia el chelechol el Ngial.

A Ngirngemelas a mlo bechil a Obirrir e dilu er ngii el ua se, "Elechal el bla bo dekaubuch e ng soak chobo modengeli a tia el kmal klou a belkul el tekoi. Ng diak el soak a chomousekool me a lechub e



moungelakel er ngak a kunga uasech  
me a bo lebechesechusem a  
chesemek."

A uriul e ng mloch dioll a  
Obirrir me ng ulemdasu el kmo  
elecha el bla bo kdioll e a  
Ngirngemelas a diak el sebecel el  
choitak. Me a ta er a klebesei er a  
lomengur e ng dilibek a bebil er a  
uasech el mo er a chesemel, me  
tiaikid e ng dula er ngii el kmo, "Ke  
dirk medengei, ng diak el soak a  
omousekool er ngak el ua isei." Me  
tiaikid e ng mocha ngmai aika el  
lidel el mechei e ngii a dmu er a  
bechil el kmo, "Aika el biskang a  
biskelengel a ngalek. A le mechell e  
a ngklel a mo Termeteet. E ngii a  
mo ousbech aika el biskang el  
mengkerengir a rechedal er a  
belual." E solae ngii a remiid el mo  
er a Ngiual.



## KEDUNGELCHEBUD ME A DANGERENGERELCHEBUD

A Ngerdilong a beluu er a Ngcheangel. Tia lekiliei er ngii a ta el mechas me ta el rubak. Tirka a mle kaubuch, e omechell el mechellii a ketengir el sechal. Te mengeklii el Kedungelchebud. Ng liluut el mo dioll ngika el mechas e mechell el dirrek el sechal. Ng kmal mle dengerenger e toketok, me a demal a mengeklii el Dengerengerelchebud. Me aika el ngklir a mera el di mlo ua blekerdelir er a lebo el meklou el chad. Me ngika el klou el chad a mlo kedung e a kekerei a mlo dengerenger.


A rechuodel e a kot el suobel a demechell e dengalek el sechal a tekoi er a omelenges me a omengaus el bub e le ng uchul a rokui el tekingel a blai el ungil er a kldemaol me a kldelaol me a klebliled er a kodall.

Me ngika el klou el chad a ulerrenges er a demal me ng mlo chad er a omelenges me ng melenges e kmal mengedmokl er a demerir me a derrir. E a Dengerengerelchebud a

di milil e diak el rengesii a ta el tekingel a demal me a delal. Ngii a mocha chesechall a mekemedit Ngirakederang er a Imeliik el kmo, a Belau el rokir a kulengit a ngeseu er kemiu, e kede melai er a Oreor. Me a lebocha tekoi er a Ngcheangel e ng mocha kirir tirka el teru el odam el mong. Me ng mle kirir el mo er a kabekel er a Desbedallechelong el Cherecheroi a ngklel. Me te mlo er ngii me a demerir a mo mellach el omades a rokui el llechul a omerael. Me a Kedungelchebud a melelem el omtab er a rengul, e mesechedekl. E a Dengerengelchebud a lolekoi er ngii a demal e ngii a di roibal a tekingel a demal e kmo, "Ak di medengei e meduch." Me a demal a kmal di mlo lmuk e diak a ngera el ledung. Me a loracl el merema a omerollir, e ngii a dibus er a blai. E a Kedungelchebud a ldu er ngii a demal el kmo, "Rungalek, ke ngmai a teruich el sualo el locha er a ilobech er a ochim, me a choir e omchiis e mo mes er ngii el merael el me kmeed e ke ouderta el melai el omidokl el omechebecheb. E se el ongeteruich er ngii a chomnguu el

ongeteruich er ngii a chomnguu el chitutii er a bdelum e ridekekl er a daob e oudeluu er ngii e oldengelengel er a daob." Iseikid a chomsobel er ngii. Me a lobuda mekemad me loltoir er a Cherecheroi el kabekel el tobeda er a delebechel er a Mechorei er a Irrai, e ng mocha dechor a buik er a Ngerbeched e mla er a kabekel er a Ngerbeched e kmo, "Uchellechelid a lii a ultirek." E a Kedungelchebud a lomes er ngii e ng meremang me ng mocha ouderta el mo mekodeterir er a taoch er a Ngetebud er a Oikull me ng ngar er ngii a btil a kabekel el dirk medechel er a elechang.

A Kedungelchebud a mlo er a Ngchesechang el mlo meketeket e merolang el rao er a Babeldaob. A demal me a delal a di melatk el kmo a Dengerengelechebud a mla mad e ng di a Kedungelchebud a dongiil er ngii. Te meseked a rubak er a bai er a Bas er a Ngcheangel e omes er a bekall el omisebusech el dirk cheroid. Me a delal ngika el Kedungelchebud er a lebong e ng mera el ngii el Kedungelchebud el merema remei.



## KATUU ME A MENERENGER

A Katuu a blai er a Ngkeklau el ta er a rengedel a Ngeraard. Tia el blai a le kiliei er ngii a ta el rubak me a ta el mechas el mle kaubuch el kmal meketeketang, e dimlak a ta el ngelekir. Me te kmal di oureng a klengelakel e kmal di diak. E a rubak er ngii el blai a mocha smecher el mad. Me a lemad e te mo doklii. E tia a blai er a kebliil me ng kiei er ngii el di mesobil. Me ng mengkar, e kiei me ng dirrek el di melekoi kesuk a bo lebad me a lebekiis el kmo, "A kekedel er a kkekerei e bo kbechiil, e lak a ta el ngelekek. Me a rebek el mekekerei el redil omechellang e ngak a mera el mekngit a chelebulek." Me ng di melekoi e kiei.

E a ta er a klebesei e ng belsecha er a rengul e le ng ko er a di merael el mo klou a delel. Me ng di kiliei el mocha belsechel a lemechell er ngii el buil, e socherang er a rektel a cheroll. Me ng di mle ngii el tang e mechellang. A lemechell e ng Mengerenger. Me ng mechellii el

mecherei e soal choitii, e ng di ngii a milechellii el ngelekel me ng mekngit a rengul er ngii a letkii, me ng di ngiluu el mo er a kederang el mo chemetii e mecherei e di oldngedingel er ngii. E ngika el mengerenger a di omeka klebesei el mo klou. Ng diak lomeka er ngii e ngii a di diak lemad. E ngii a lueta el mo dioll me ng kiei el mechucher a bilel e mechellang. A lemechell e ng Katuu. Me ng kmal mekngite a rengul. Me ng dula el kmo, "A rumechell a omechell er a rechad el mei er a beluulechad me te kaingeseu er a delengchekkir, e ngera tia el kerior el kngar er ngii." Me aika el lolekoi a di lodengei a ngelekel er a Mengerenger. Me te kiei e a Katuu a medengellii a Mengerenger me ng merael el mong. Me a lebong e a Mengerenger a kmu er ngii el kmo, "A klukuk e ng di tutau e ke mei, e kede merael el diak dengar er tiang." Me a bo lekukuk er a tutau e ng mochang. Me a lebong e a Mengerenger a dilu el kmo, "Bo mngasech er a ulkek e kede merael." A Katuu a mocha ngmasech er a ulkel e te merael. Me a lora el mo er

a Ngeluul el ingssel a Beluulechab, e ng mo el mo bereked er a chelechol e a merrengel er a Katuu a kmo, "Ak kmal songerengerang." Me a Mengerenger a mocha rullii el beng, e dmu er ngii el kmo, "Moutekangel e bo el meched a chei me lemad aika el ngikel el ngar er a remengek e mongang." Me ng melekoi el ua isei, e te mengiil er a chedlchei e a Dedmau el chad er a Ngeluul a melenges me ng ngar er a chetebtel a ilotel el lius e a lomes a ngikel e ng kmal omdebud me ng merema metei e mochang. A lebong e a mengerenger a ngokisii a btelul me a Dedmau a chiliis. Me a mengerenger a dilu el kmo, "Rrach, lak komchiis e be mkeed e ng ngar er ngii a tekoi el kulekoi er kau." Me ng mocha dechor e ng dmu er ngii el kmo, "Bo mnguu a chimo el lius el kosir e mngai el mei me longa ochedak e mngai a teblo er a mengur el mei me kngim. E kau mokoad aika el ngikel el rokui me lecheldim, e bo mungil el mesa tia el teletelek e msuubii e mlecha utibek er tia el teletelek, e mchedesii er a bad e moldingel er ngii a bo el meched a

chei. Ke mo mengeklii tia el teletael el kmo beng er a ngikel. E mnguu ngika el merrengel el ekong me mobang el chedam, e ng di diak mo meka er ngii er a tuu e le ng mad e le ki oudelasech a tuu." Me ng kmal mlo ungil el remenges a tekingel. E a mengerenger a mocha mellach er a merrengel er a Katuu. "Ke mong me a bo lungil er kau e ke mo ungil el remenges a tekingel. E a bo el mekngit er kau, e ke mo mekngit." Me a le bocha Dedmau e ng milsa imelel me a kelel a katuu e locha utibek er a ilalik e suubii e rodellii a merrengel a mengerenger e nguu el kmal mlo ungil er ngii.

A katuu el charm a kmal diak longa tuu. e le ng oudelasech. Chobo er a rokui el omerellel a tuu me ng di diak longang. A katuu chomterkeklii e ng mo merechorech. E a chomchelechii, e ng mo kedung el diak el dengerenger.

## MERUK ME A BECHARS

A Ngerdobotar a rengedel a Imeliik er a mo bedul a diluches er a Imeliik. Tia el beluu se er a er a irechar er a kmal rechuodel er a Belau a mle lobdois a rechad er ngii. Te mle ungil beserir e le ng meklou e betok a cheled er a cheleched er ngii me a cheremelel a meklou. A omochelel a klou me a bo el kemtimt me ngii a diak lebo lak ralm er ngii. Me ng diak a ngodech el lebo el metacherbesul er ngii. Ng kmal di blotech a rengud a dekiei er ngii. Ng di ureor er a buai er itia el beluu a chelsang el chosengkid, e diak a ngodech el ureor el bo demechesang er ngii. Se el ledubech a ureor el buai, e a Bechars el merreder er a Ngerdobotar a ouchais er a rechad er a beluu. Ngika el chad a meteet el ngar er ngii a deruchellel el merreder er a Ngerdobotar me ng kdekudel. Ng kmal diak a omelengmesil er a remechebuul a loked a ureor me a rokui el tekoi er a buai, el di ua lolekoi er a reengelekel er a blil. A rechad er a Ngerdobotar a kmal diak a ta el odeu a rengrir er

a rokui el omerellir er a buai er tir. E a Meruk el ongeru el chad er ngii a kmal chebuul a blekeredeled, e ngar eou a rengul el meaiu a ngerel. Ngii me a bechil a di osisiu a blekerdelir. A blirir a betok a kall me a chemachel me ng chimo el beluu er a Ngerdobotar el oililaol er ngii, e omengur, e ousueleb e omesoil er ngii er a bek el klebesei. A Meruk me a bechil me a reengelekel a kmal di osisiu a blekerdelir el kmal bekokuui, e bekerurau er a rechad. me ng di blechoel el ongdibel a blil a Meruk er a bek el klebesei.

A blil a Bechars a oliangel el diak a remo er ngii el chad er a buai me te di rechederir kung. Me a lekedur a ureor er a buai me lebong e a Bechars a di ngii el tang el merael el mong. E a Meruk a loraal er a beluu, e te kaokedong el mo dmak er a telkib e merael el bechob ruk el mo er a ureor. Me a bo el merek me lebo rrei, me te mo dmak er a rael el mo er a blil a Meruk. Aike el mo diak er tir a ledak el mong me te ngmai, e mo kairirei.

Me te di mle ua isei me a Bechars a kmal di mle ngii el mo

merur er a blekerdelel e le chederderel a di merael el mo diak el sebeciel e le ngerel a meringel me medal a chebecheb el diak a ko er a botchereng el delii el kirel a deleuill er a rechad. Me a delengcheklel me ng mlo ongengael er a rechad er a belual.

Me te kie ea ta er a klebesei e a Bechars a mocha er ablil a Meruk e melekinga er ngii el kmo, "Rrach, a Ngerdobotar a obiteklang, me a kulengit er kau me deluut el mo dmak e dekedur a beluu e deluut el suumech a delongeled el mo ungil el mo ua irechar." A bo lolekoi a Bechars el mengideb er a beluu e a rechad a bai chemoit a tekingel, e oketa mo er a chei e diak lebong. Me ng liluut a Bechars el mo er a Meruk el di mle ngii el oderchelel el mong. Me ng di mle Meruk el ngii el tang a ngilsenges a tekingel, e tia el chimo el beluu er a Ngerdobotar a dimlak a molab a tekingel. Me ng di mla a mong me ng di mle ngii el mocha medengell el kmo tia el kngar er ngii el tekoi a locha chetirir a rechad ngak me a tekingek me a iltetek a di iltetel er a blik el diak lebo er a buai.

Me ng mocha meluluuch er a Meruk el kmo, "Rrach, ak meskau a ngerachel me ke mo oungerachel er a beluu. Me ke di ongeru el chad e ng di ke moba beluu, me a dui ak telechull er ngii e ng di kau a mo menga a dikesel a kot. E ngak a ngmanget el mo menga er a dikesel a ongerung. Me ak mo menga dikesem." Me ng di mle ngii el Bechars a ngiltii a kelel, e a dial a dimlak. Ng di mla ua isei el tekoi er rechuodel el mei er a elecha el beluulechad. Me ng belkul a tekoi el kmo, ke ko er a Berchars er a Ngerdobotar el di mo becheleleu. Me a demeteet e ng diak dedu el kmo, ngak a meteet me di lekid el mengull er kid. A demeteet e a medad a mo ungil me a ngered a me er eou me a rechad a kullid.



## Belkul a tekoi

### B

bechobech ruk	-- Ta meklemengetir el blechobech
bechoel	-- Di blechoel el ngar er ngii a omech a dubech el tekoi
beng	-- Cheldukl el bad el omub a ngikel
bengadakl	-- Chelebuul
bikei	-- Rebuik
bisaol	-- Osengel, Ues
bkeikl	-- Sebechel el obkais
blotk	-- Omerdekekl
blucheel	-- Teletelel
botech	-- Ke rdi oldeu a rengrir
but	-- Btil a cheriut

### CH

chebedes	-- Mekngit el rakt
chebill	-- Chorars el melenget er a smecher el chad
chebul	-- Mengub
chemetii	-- Mengaet
cheos	-- Sils
cherroakl	-- Cherroir
chetkongel	-- Chimad er a uloech
chobeduul	-- Aike el meched el betbeduul el ngar er ngii a bad
cholbii	-- Oeak a diak lorreall el mo er a otaor
choruakl	-- Ongeru el omelekoi
chotekil	-- Me a leme chad el mo oltak er ngii
chusel	-- Ongulel, ongraol

## D

dalem	-- Kekerei el buuch
danges buadel	-- Smecher el di dengarech el mechiuaiu
deldalech	-- Esberberel a uingel el bechachas
deleukes	-- Dikesel ngike el meluchel er a dui el chad
diakutul	-- Diak kulekoi
didil	-- Rolel
didiul a bellau	-- Oldiu el ko er a omelau a tekoi
dik	-- Ng ua luleldik
dikesel	-- Blingelel a kall er a chelsel a klobak, Se el blingelel
diklongang	-- Kloi
dikukereng ku	-- A di kulebedebek
dilidichii	-- Se el dolidiich er a chad
diouketui	-- Ngke el soal e meruul er ngii e lekong diak el soak
ditangerkoi	-- Di chimo el ngalek
ditmechiir	-- Sis lolebes er a rsmecher
dongesii	-- Omuchel el mo mesang
duchar	-- Muk dechar, rullii el mo mesisiich

## E

esesel muk	-- Me di kluk
------------	---------------

## I

iaech	-- Llel a lius el melekau a ralm el mo er a chollumel
ilamrokl	-- Ngikel el ko er a tungch
ilbelbii	-- Liueklii
iratel	-- Aike el besebes el omart er a rechad me ng diak
	lemedangch
irretii	-- Mengeuid er a bedengel el mo diak el medangch

itnger

-- Kede ngmai a llechud er ngii

## K

kaeb

-- Kot el bekerurt el mlai er a Belau

kaiul

-- Keai

kebekuul

-- Kingellel a klobak

kebir

-- Kaeb er tir

kebudu

-- Kakerous el losiik

kederael

-- Se el bita er a mlai el diak loudesomel

kemechesur

-- Dibchii

kengbokl

-- Soad el mong e le kede ko er a nguibes

kerreomel

-- Chad el metmedium er a blil a delal el omes er ngii er  
aike el bek el lousbech

kesebakl

-- Suebek a rengul

ketord

-- Ngklir a rebekeu el chad

keuoi

-- Ke kot

kibis

-- Betok el chad lomes osongel

kirekir

-- Diu er a mekemad

klbadel

-- Mla mo medengei el tekoi el ua isei

kldalluked

-- Ng uaia lluked

klekerengel

-- Mengkar er ngii

klomengelungel

-- Tekoi er a remengol el redil

kelulau

-- Aike el llach er a beluu

kodauid

-- Ko mokodir a Olbidel

koll

-- Kmoll

kerousuchokouid

-- Merous a bento (okouid)

ksichedekla

-- Ngmai locha er a btill a eritel me lak lobes

ktililem

-- Ng uai a telchemakl a ngerek

## L

lled

-- Roled

## M

meangel koi	-- Koi el daob le ng tobedung
mebeabed	-- Diak el sa el blektakl osenged el mesang
mecheseb	-- Milsibech a titiul a kerrekarak
mechucher	-- Omchur
mekatongel	-- Omekeek a telongelel
mekngosi	-- Selumech el llel a kerrekarak
melai	-- Cholkerekill er a klalou el ngar er a ulebongel er a blai
melalemioi	-- Mengeleklel se el omenged
melat a ngeltel	-- A lak le ngii e ng metacherbesul
melechsulik	-- Etau me a eolt el mo kaisiuekl a debel
melitech	-- Oltitech
melulau	-- Bai el beluu er a Beliliou
meluluut	-- Soal mo meduch e medakt a rengul
melumk	-- Omditm
mengetobt	-- Se el blabo el dum a dersechimo el bad er a kereker
mengiruo	-- Melebodeb
mengol	-- Mengereker el redil. Oba klalo er a ongelngelel
merirt	-- Remurt
merrars	-- Aike el omekeuad a techebel a eualech el eluikl el bambuu
merrau	-- Se el dolab a derau el ngar er a chei
metouch	-- Omtang er a beldeklel a cheldecheduch
milngakl	-- Di melta el rokui el ridekekl
mlengeul	-- Mo mekikngit a rengul
mlongebet	-- Di kiliei le ng mlo bechiil
moiuaui	-- Budech
momtori	-- Diak a mo sebelii

## Ng

ngeliil	-- Kerrekar el mla mo nglangel
ngeriakl	-- Diak el sebechel er a chlitechetul
ngesechelem	-- Se el bo mngasech er ngii el mo er a blai
ngirreau	-- Ng uai a kdilu er kau
ngukokl	-- Kileberruul
ngusem	-- Bechil chochedam el bechiil el redil

## O

obei	-- Ngklel a diak el ungil kukau
oiu	-- Chetau
okerduul	-- Kekerei el iungs er a medal a Imeliik
okouil	-- Bento
oktemang	-- Rubak er ablai el kmeed er a demad
oleongel	-- Delongelel a beluu
oletongel	-- Aike el besibs er a desomel
olikar	-- Ngklel a direkork el mela ngikel
oliongel	-- Se el diak el sa el bo er ngii a rechad
olsomel	-- Bo mesemau
oltall	-- Olekall el chutem
omaiuaiu	-- Ungil budech
omibiul	-- Ng omibii er a biull el kob
omekrengukl	-- Ngklel a kot el klebokel el charm
orebakel	-- Blil a dekel me a besos
oteiil	-- Ngke el doltoir er ngii el chad
ourengor	-- A chelid a soual me ruebet er ngii
ousikero	-- Oba uuked el mela charm el kall

## R

## R

rokerk	-- Sebekreng
rongel	-- Didichel
ruetengel	-- Tirke el delal a blai el sebechir el mo kldorolel a blai

## S

sob	-- Ongeluluul
soilekelam	-- Somam

## T

tangadik	-- Delsachel el biskang el ko er tengadidik el charm
tekeiungel	-- Tekoi er a deleuiil
telbenged	-- Ta el bo er ngii
telengtengil	-- Beldeklel a tekoi
telmukl	-- Aike el ngar er ngii a mo ultutelel er a ngar er a medad el klebesei
teliriu	-- Kometerekokl el chelebuul
temetat	-- Bar el ko er a mechut
temlengel	-- Belngel
tengetongel	-- Ngke el dolenget er ngii el chad
tet	-- Mekekerei el ko er a blai el blil a chedul a chad
tichiau	-- Udoud el lechudel a ruerrot el outkeu er a chad el mo tuchelii a klobak
titiul	-- Ngelekel
tmanges	-- Omtok
tmuil	-- Se el be el dum a medad er a blai
totau	-- Kerreel el orreked er a desomel

## U

uka	-- Omchelel a tekoi
ulechechisakl	-- Be el teletelel


ulekebai	-- Ng diak kobong
ulitech	-- Eleuil a lius el klebkikl er a tuangel el omart er a rechad el ngar er a blai
ulochel	-- Omlaoch er a ngar er a medad el tekoi
ulongoklel	-- Ultebengel me ng diak dobes er ngii
ulseuechel	-- Bita el lulekngellel a kim
ulungoaol	-- Mo er a chei er a ngoaol
utang	-- Uchelel a tekoi
utibek	-- Tebchelel a teletelel



## Bibliography

1. **Chedecheduch er Belau: Palauan Legends** No. 1  
Published by The Palau Community Action Agency  
1971
2. **Palauan Legends: Chedecheduch er Belau** No. 2  
Published by The Palau Community Action Agency  
1975.
3. **Rechuodel:** By The Palau Society of Historians Vol.I  
published 1995
4. **Rechuodel:** By The Palau Society of Historians Vol.II  
published 1995

- 1) NGEDEBUUL - KAYANGEL
- 2) RTELUUL - NGERCHELONG
- 3) KERRADEL - NGARAARD
- 4) ONGEDECHUUL - NGARDMAU
- 5) KIUELUUL - NGIWAL
- 6) IMEUNGS - NGEREMLENGUI
- 7) NGETELNGAL - MELEKEOK
- 9) OLDIAIS - NGCHESAR
- 11) BELIAS - AIRAI
- 12) ERNGUUL - KOROR
- 10) NGERBUNGS - AIMELIIK
- 8) NGERDUBECH - NGATPANG
- 13) ODESANGEL - PELELIU
- 14) EDEAUR - ANGAUR
- 15) SUNGESOL - SONSOROL
- 16) TOHOBEI - HATOHOBEL
- 17) BUL - PULO ANA



(Southwest Islands  
are located some 200 to  
380 miles Southwest of  
Koror)

